

2 Samuel

Ni amatlapohuali techilhuía senquistoc tlen David huan itlanahuatijcayo. Achtohui David quihuicayaya tequitl queja tlanahuatijquetl san ica campa itoca tlali Judá. Pero teipa elqui tlanahuatijquetl nojquiya tlen nopa tlali ica norte o nochi nopa tlali Israel. David monejqui quintehuis icualancaitacahua tlen israelitame huan tlen sequinoc tlali ehuaní. David itztoya se tlatatl tlen chicahuac quiicneli huan quineltocac TOTECO. Nojquiya itztoya se tlatatl tlen huelqui quichihua huejhuéyi tlajtlacoli. Pero teipa quitlajtlani TOTECO ma quitlapojpolhui huan quiseli itlatzacuiltl huan sampa quitoquili TOTECO. Israelitame tlahuel quiicnelijque David hasta para nochipa quinequiyayaj seyoc tlanahuatijquetl queja David.

2 Samuel quiyiya ome hueyi partes:

2 Samuel 1 – 4 David tlanahuatía ipan Judá

2 Samuel 5 – 24 David quinnahuatía nochi israelitame

2 Samuel 5 – 10 David tlatlani campa huéli

2 Samuel 11 – 12:25 David huan Betsabé

2 Samuel 12:26 – 20 Tlaohuijcyotl huan tlaijiyohuili

2 Samuel 21 – 24 Itlamiya xihuitl tlen David

David quicajqui para mijqui Saúl

1 Quema ya mictoya Saúl, David mocuepqui ipan ialtepe Siclag pampa ya tlantoya quintzontlamiltía nopa amalecítame huan nopona mocajqui ome tonali. **2** Huan ipan ne seyoc tonali, ajsico se tlatatl tlen quisqui tlen isoldados Saúl. Yaja quihualicayaya iyoyo tzayantoc huan motlalilijtoya tlattejpocltl ipan itzonteco pampa quiyiyayaya hueyi cuesoli. Huan quema ajsico campa David mohuijzonqui ica miyac tlatlepanitacayotl. **3** Huajca David quitlajtlani nopa tlatatl:

—¿Canque tihuala?

Huan nopa tlatatl tlananquili:

—Na nicholojtejqui campa toisraelita tlatacajhua tlatehuía.

4 Huan David quiilhui:

—Xinechilhui tlaque panotoc ipan nopa tlatehuijcyotl.

Huan nopa tlatatl quinanquili:

—Miyac toisraelita soldados mictoque

huan miyac cholojtejqoue. Huan nojquiya mijqui Saúl huan icone, Jonatán.

5 Huan David quitlajtlani:

—Huan ¿quejatza tijmatqui para mijqui Saúl huan icone?

6 Huajca quinanquili:

—Na niitztoya ipan tepetl Gilboa huan nopona niquitac para Saúl motlatzquiliyaya ipan icuatlami tlen huehueyac. Huan monechcahuiyayaj icualancaitacahua ipan tlatehuijca carros. Nojquiya hualayayaj miyac tlacame ipan cahuyos. **7** Huajca ipan nopa tlalochtli Saúl nechitac huan nechnotzqui. Huan huajca nimonechcahui campa itztoya. **8** Huan yajaya nechtlajtlani ajqueya na huan niquilhui para nieliyaya se niamalecita tlatatl. **9** Huajca techilhui: ‘Xihuala huan xinechmicti pampa tlahuel nitlajiyohuía, huan noja niyoltoc.’

10 Huajca nimonechcahui huan nijmicti pampa nimomacac cuenta para ayoc huelis itztos pampa tlahuel mococojtoya.

Huan nijcuili icorona tlen quipixtoya ipan itzonteco huan nopa costli tlen quipixtoya ipan ima huan nimitzhualiquilía ta.

11 Huan quema quicajqui nochi tlen quijto, David huan nopa tlacame tlen itztoyaj ihuaya quitzayanque ininyoyo pampa tlhuel mocuesojque. 12 Huan pejque quichoquilíaj Saúl huan itelpoca Jonatán, huan nopa isoldados TOTECO huan nochi sequinoc israelitame, pampa tlhuel miyac tlacame mictoyaj ipan llatehujicayotl nopa tonal. Huan mosajqui David huan itlatequipanojcahua, huan ax tleno quicujque hasta tlayohua. 13 Huan David quiihui nopa tlacatl:

—¿Canque tiehua?

Huan quinanquili:

—Na nisejcoyoc ejquetl, niamalecita.

14 Huan David quiihui:

—Huajca ¿para tlen ax timajmajqui timomatlalanqui huan tijmicti Saúl tlen TOTECO quitlapejpenijtoya huan quitequitlaliytoya?

15-16 Huajca David nimantzi quinoztqui se soldado huan quiihui:

—Xijmicti ni tlacatl.

Huan David quiihui nopa tlacatl:

—Timiquis pampa ta ica moseli tiqijto para tijmicti Saúl, nopa tlacatl tlen TOTECO quitlapejpenijtoya para elis tlana-huatijquetl.

Huan isoldado hualajqui huan quimicti ica icuatlami tlen huehueyac.

David quichoquili Saúl huan Jonatán

17 Huan David quisencajqui se huicatl huan huicac tlen Saúl huan icone, Jonatán, tlen mictoyaj. 18 Huan tlanahuati ma quimachtica nopa soldados tlen tlali Judá ehuani. Huan ni huicatl nojquiya mopantía ijcuilijtoc ipan nopa amatlajcuiloli tlen itoca Jaser. Huan quej ni quijtohua:

19 “Noisraelita icnihua, nopa tlacatl tlen más yejyectzi tijpixque, mictoc.

Yaja tlen achi más techmacayaya paquulistli quimictijtoque nepa huejcapa campa tepetini.

Quena, yajaya tlen más tetic huetztoc.

20 Amo xiquinilhuica tocalancaitacahua tlen itztoque ipan altepetl Gat.

Niyon amo xiquinpoahuilica tlen itztoque ipan tianquis ipan altepetl Ascalón,

para ax ma techhuetzquilica nopa filisteo sihuame.

Ax tijnequij ma techpinajtica nopa sihuame tlen ax quineltocaj TOTECO.

21 Saúl mijqui ipan tepetl Gilboa.

Huajca ax quema ma tlahuetzi nopena.

Niyon ax quema ma onca ajhuetctli. Ma ayoc tlaelilti pampa nozona mijqui tlen motemacac.

Nozona mijqui Saúl queja se tlen hueli tlacatl, queja elisquía ax ya tlen quitlapejpeni Toteco.

22 Saúl huan Jonatán nochipa tlatlaniyayaj ipan llatehujicayotl.

Inijuanti quinmictiyayaj inincualancaitacahua,

yonque tlhuel motemacayajaj.

Ax quema mocuepque ipan se tlatehujicayotl san ininma, pampa nochipa tlatlaniyayaj.

23 Nochi tojuanti tiquinicneliyayaj huan tlhuel tiquinnequiyayaj.

Nelía se paquulistli para tiquinixmatise.

San sejco nemiyayaj quema itztoyaj huan nojquiya san sejco mocajque ipan miquistli.

Achi más chichahuac huelque motlalojque que ne hueyi cuajtli tlen hueli patlani.

Elque más tetique injuanti que se león.

24 Inisraelita sihuame, xijchoquilica Saúl tlen yejyectzi inmechyoontiayaya ica yoyomitl tlen moradojtic queja motlalilíaj sihua tlanahuatiani.

Quena, Saúl quiyeyecchijqui imoyoyo ica oro,

huajca xijchoquilica.

25 Yaja tlen motemacac ya mijqui ipan llatehujicayotl.

Mijqui Jonatán ipan ne tepetl Gilboa.

26 Nimitzchoquilía noicni, Jonatán,

pampa tlahuel nimitzicneli.

Huan tinechicneli miyac nojquiya hasta motlaicnelil quitlani inintlaicnelil sihuame.

²⁷Mictoque tlen más motemacayaya.

Ayoc quinemiltíaj inintepos pampa ya mictoque.”

Queja nopa elqui nopa huicatl tlen David quisencajqui para quichoquilis Saúl huan Jonatán.

Quichijque David tlanahuatijquetl

ipan tlali Judá

2 Huan teipa David quitlajtlani TOTECO: —¿Tijnequi ma niya para niitztos ipan se altepetl ipan tlali Judá?

Huan TOTECO quinanquili:

—Quena.

Huajca David quiilhui:

—¿Ipan tlaque altepetl niyas?

Huan TOTECO quiilhui:

—Xiya altepetl Hebrón.

²Huajca David yajqui huan quinhuicac nopa ome isihuajhua. Se itoca Ahinoam tlen eliyaya se jezreelita sihuatl huan ne seyoc itoca Abigail tlen achtohui eliyaya isihua Nabal tlen Carmel. ³Huan nojquiya quinhuicac nopa tlacame tlen nejnentoyaj ihuaya, sese ica isihua huan iconehua. Huan nochi nozona yajque para itztose ipan altepetl Hebrón.

⁴Huan teipa hualajque nopa tlayacanca tlacame ipan tlali Judá. Huan quialtijque David ica aceite huan quichijque tlanahuatijquetl ipan inintlal.

Huan teipa quiilhuijque David quejatza nopa altepetini Jabes ehuani ipan tlali Galaad quitlasojtlaque Saúl itlacayo huan quitlalpachotoj. ⁵Huajca David quintitlanqui tlacame ma yaca quinilhuitij ni tlajtoli: “Ma TOTECO inmechtiochihua miyac pampa inquitlasojtlaque nopa mijcattzi Saúl huan ica miyac imotlaicnelijcayo inquitlalpachojque. ⁶Huajca ama ma TOTECO inmechtlasojtla. Ma inmechita ica cuali huan ma inmechnextili tlen xitlahuac. Huan no nojquiya nimechchihuilis tlen cuali ipampa tlen inquichijtoque. ⁷Huajca ama yonque ya mictoc Saúl, imotlanahuatijca, ximosemacaca, huan ximo-

temacaca huan ximotlalica tohuaya pampa nopa tlayacancani tlen tlali Judá nechchijtoque niinintlanahuatijca.”

Is Boset quichijque tlanahuatijquetl ipan tlali Israel

⁸Teipa Abner, icone Ner, tlen quinyacanayaya isoldados Saúl quihuicac Is Boset, icone Saúl, ipan altepetl Mahanaim, ⁹huan nozona quichijqui tlanahuatijquetl. Huan itlanahuatilis quiajsic taltini Galaad, Gesuri, Jezreel, Efraín, Benjamín huan hasta nochi tlen itoca tlali Israel ica huejcapa. ¹⁰Huan Is Boset quipiyayaya ⁴⁰xihuitl quema pejqui tlanahuatía ipan tlali Israel ica huejcapa huan san huejcajqui ome xihuitl. Huan nochi tlen itztoyaj ica tlatzintla campa itoca tlali Judá quitoquiliijque Tlanahuatijquetl David. ¹¹Huan David elqui tlanahuatijquetl ipan tlali Judá para chicome xihuitl huan tlajco huan quipixqui ichaj ipan altepetl Hebrón.

¹²Huan teipa Abner quisqui ipan tlali Mahanaim ininhuaya isoldados Tlanahuatijquetl Is Boset huan yajque altepetl Gabaón ipan tlali Judá campa itztoyaj iixhuihua Benjamín, pampa nojquiya quinequiyaya mocuilis nopa tlali Judá para elis iaxca Tlanahuatijquetl Is Boset. ¹³Huajca quisqui Joab, icone Sarvia, tlen eliyaya tlayacanquetl tlen isoldados David huan yajqui ica isoldados quinnamiquitoj. Huan monamijque campa nopa mantoc atl ipan altepetl Gabaón. Huan isoldados David mocajque ipan se nali, huan isoldados Is Boset ipan seyoc nali nopa mantoc atl. ¹⁴Huan Abner tlen eliyaya itlayacanca Is Boset quinzotzqui Joab tlen eliyaya itlayacanca David, huan quej ni quiilhui:

—Achtohui ma motehuica san sequin totelpocahua para ma tiquintlachilica huan tiquitase ajqueya tlatlanis.

Huan Joab tlananquili:

—Cualtitoc.

¹⁵Huajca quintlapejpenijque majtlacltli huan ome telpoca soldados tlen eliyayaj ica David huan majtlacltli huan ome telpoca soldados tlen tlali Benjamín huan eliyayaj ica Is Boset. Huan moixnamijque nopa

telpocame huan pejqe motehuá. 16 Huan sese inijuanti quitzoncalitzqui tlen itztoya imelac huan mocalaquilijque inincuatlaminhua tlen huehueyac ipan inielchiqui. Huan nochi nopa 24 telpocame mijque ica sampa. Huan yeca quitocaj-tijque nopa lugar “campa tlatehujque ica cuatlamintli tlen huejhuehuyac”, huan mocahua ipan altepetl Gabaón. 17 Huan teipa pampa ax aqui tlatlantoya, pejqe tlatehuá nelfa chicahuac nochi isoldados David ihuaya isoldados Is Boset. Huan nopa tonal isoldados David tlahuel quintlanque isoldados Is Boset huan inintlayacanca Abner. 18 Huan nojquiya nopona itztoyaj nopa ome iicnihua Joab, nopa tlayacanquetl tlen isoldados David, tlen inintoca eliyaya Abisai huan Asael. Huan Joab, Abisai huan Asael nochi eliyayaj iconehua Sarvia. Huan Asael tlahuel huelyaya motlahohua chicahuac queja se masatl. 19 Huan yajaya pejqe quittepotztoca Abner, nopa tlayacanquetl tlen isoldados Is Boset, huan ax tleno quicahuili ma quitzacuili. Ax quicajqui iojhui, niyon nica, niyon neca. San quitoquilijtiyajqui. 20 Huan quema Abner moicancuepqui huan quititac para quitoquiliyaya, quiilhui:

—¿Ax ta tiAsael?

—Quena, na niAsael —quinanquili.

21 Huajca Abner quiilhui:

—Ximijcueni. Xijtoquili seyoc nosoldado huan ximocahua ica nochi tlen yaja quiipiya.

Pero Asael ax quinejqe quicahuas.

22 Huajca Abner sampa quiilhui Asael:

—¡Xinechahua! ¿Para tlen monequi nimitzmictis? Huan ¿tlaque noxayac ica nijtlachilis moicni Joab quema sampa timonamiqise?

23 Pero Asael ax quitlacaquili, huan huajca Abner quisentlapalhuili ica icuatlami tlen huehueyac huan nopona huetzqui mictoc Asael. Huan teipa nochi tlen ajsiyayaj campá huetztoya Asael moquetzayayaj ica tlatlepanitacayotl. 24 Huan teipa Joab huan Abisai pejqe quitoquilíaj Abner huan quema calaquito tonati, ya ajsitoyaj ipan se tlachiquili tlen itoca Amma nechca Gía ipan nopa ojtl tlen yohui

para altepetl Gabaón. 25 Huan mosansej-cotilijque miyac iixhuihua Benjamín para quipalehuise Abner huan moquetzque tlachiquiltipa. 26 Huan Abner quinotzqui Job ab chicahuac ica huejca huan quiilhui:

—¿Monequi nochipa tijsenhuiquilijto-se timomictíaj? ¿Ax timomaca cuenta para tlatehujcayotl techhualiquilía miyac cuesoli? Xiquintlacahualti mosoldados para ma techcahuaca pampa tiicnime.

27 Huan Joab quinanquili:

—Nelfa tlen nimitzilhuía, intla ta achtohui ax tiquijtojtosquía ma tiquintlapepenica 12 totelpocahua para tlatehuise, ax oncatosquía tlatehujcayotl. Nochi nosoldados san mocueptosquía ininchajchaj ama ijnaloc.

28 Huajca teipa Joab quipitzqui cuacujtli huan nochi isoldados David moquetzque huan ayoc tlatehujque, niyon ayoc quintoquilijque nopa sequinoc israelitame tlen ejque tlali Israel ica huejcapa. 29 Huan Abner huan nochi isoldados nojquiya nejnenque seyohual huan apanoque nopa tlamayamitl huan nopa atemitl Jordán huan nejnenque hasta ajsitoyaj ipan altepetl Mahanaim.

30 Huan Joab nojquiya quinsentili isoldados David huan quinpojqe huan polihuiyayaj 19, huan iyoca polihuiyaya Asael tlen Abner quimictijtoya. 31 Pero isoldados David quinmictijtoyaj 360 tlen motlalijtoyaj ihuaya Abner, itlayacanca isoldados Tlanahuatijquetl Is Boset, huan nochi itztoyaj iixhuihua Benjamín tlen calactoyaj ihuaya.

32 Huan teipa Joab huan isoldados quihuicaque itlacayo Asael huan quitlalpa-chojqe nechca itata ipan altepetl Belén. Huan teipa nejnenque seyohual huan quema tlanestihualayaya ajsitoyaj ipan inialtepe, Hebrón.

3 Huan ica ya ni pejqe miyac tlatehujcayotl ica inijuanti tlen quitoquiliyayaj icone Saúl huan tlen quitoquiliyayaj David. Pero isoldados David achi más momiyaquilijtiyohuiyayaj huan quipixtiyohuiyayaj más chicahualistli. Huan isoldados icone Saúl caxantiyohuiyaya ininchahualis pampa quitlahuelcajtiyohuiyayaj.

**Ya ni iconehua David tlen tlatcatque
ipan altepetl Hebrón**

(1 Cr. 3:1-4)

2 Huan nozona ipan altepetl Hebrón tlatcatque iconehua David:

Iachtohui cone quitocajti Amnón huan eliyaya icone ica Ahinoam tlen eliyaya se jezreelita.

3 Iompaca cone quitocajtlali Quileab huan eliyaya icone Abigail tlen achtohui eliyaya isihua Nabal tlen ejqui altepetl Carmel.

Iexpa cone David quitocajtlali Absalón huan eliyaya icone seyoc isihua tlen itoca Maaca tlen eliyaya iichpoca Tlanahuatijquetl Talmai tlen tlanahuati ipan tlali Gesur.

4 Inajpa cone David quitocajti Adonías huan eliyaya icone seyoc isihua tlen itoca Haguit.

Imacuilpa cone David quitocajtlali Sefatías huan eliyaya icone seyoc isihua tlen itoca Abital.

5 Ichicuasempa cone David quitocajti Istream huan eliyaya icone seyoc isihua tlen itoca Eglá.

Nochi ya ni eliyaya iconehua David tlen tlatcatque ipan altepetl Hebrón.

Abner mosansejcotili ihuaya David

6 Huan nochi nopa xihuitl quema tlatehuyiyaj isoldados David ica isoldados Tlanahuatijquetl Is Boset, Abner itlayacanca Is Boset achi más mohueyimatiyaya. 7 Huan teipa Abner motemacac para cochis ihuaya se sihuatl tlen achtohui eliyaya iompaca sihua Tlanahuatijquetl Saúl tlen ya mictoya. Huan itoca nopa sihuatl eliyaya Rizpa huan eliyaya icone Aja. Huajca Tlanahuatijquetl Is Boset quitlacahualti Abner huan quiilhui:

—¿Para tlen ticochtoc ihuaya tlen eliyaya icahual notata, Tlanahuatijquetl Saúl?

8 Huan Abner tlahuel cualanqui ica tlen Tlanahuatijquetl Is Boset quiijto, huan quinanquili:

—¿Tinechita para se nichichi? ¿Tinechita nise mocualancaitaca queja tlen

ehuaj tlali Judá? ¿Quejatza huelis? Na nimitzchihuilijtoc tlen cuali ta huan motata Saúl, huan iicnihua huan ihuampoyohua. Na nihuelosquía nimitztemactilijtosquía ica David, pero ax nijnejqui. San nimitztemactilijtosquía, huan ama queja notlaxtlahuil, tinechteilhuía para nitlajtlacolchijtoc ihuaya se sihuatl. 9 Ma Toteco Dios nechtlatzacuilti intla ax nijpalehuiti David para ma quimoyahuas itlanahuatilis hasta quiajsis nochi tlatini tlen TOTECO quiilhijtoc para quimacas. 10 Nijpalehuis mitzquixtilis ta huan ichaj motata Saúl nochi imotlanahuatilis ipan ni tlali Israel huan nijchihuas ma pano ica David hasta ya quinnahuatis nochi israelitame campa hueli tlen tlali Dan ica huejcapa hasta altepetl Beerseba ica tlatzintla.

11 Huan Tlanahuatijquetl Is Boset ax huelqui quinanquili Abner pampa quiimacasiyaya. 12 Teipa Abner quintitlanqui tlacame para ma quiitatij David huan para ma quiilhijti quej ni: “Nochi ni tlali Israel nelía moaxca ta para tijnahuatis. Xijchihua se tlajtolsencahuali nohuaya huan xinechmaca nopa tequitl tlen nijnequi ipan motlanahuatilis huan nimitztemactilis momaco nochi tlali Israel ica huejcapa.”

13 Huan David quiijto: “Cualtitoc, nijchihuas se tlajtolsencahuali mohuaya, pero san se tlamantli monequi. Ax nimitznamiquis para ticamatise hasta tinechhualiquilis nosihua Mical, yajaya tlen iichpoca Tlanahuatijquetl Saúl tlen ya mictoc.” 14 Huan nojquiya para nesis xitlahuac, David quitlajcuilhui Tlanahuatijquetl Is Boset huan quiilhui: “Xinechmactili nosihua Mical pampa timosencajque ica cuali. Huan nijtlaxtlahuil motata Saúl tlen tlajtlanqui pampa quinejqui ma ninquinmicti nopa 100 filisteo tlacame huan nijchijqui.”

15 Ama Mical quipixtoya ihuehue tlen itoca eliyaya Paltiel huan yaja eliyaya icone Lais. Huajca Tlanahuatijquetl Is Boset tlanahuati para ma quicuilica. 16 Huan ihuehue yajqui ihuaya isihua huan chocatiyajqui. Huan quitoquilijtiyajqui nochi ojtlí hasta altepetl Bahurim, huan nozona Abner quiilhui: “Ximocuepa mochaj.” Huan Paltiel mocuepqui ichaj.

17 Huan Abner quincamahui nopa huehue tlacame tlen tlali Israel huan quinilhui: “Achtohui inquinahtoyaj para elis imotlanahuatijca David, 18 huajca ama ya ajsic nopa tonal para queja nopa ma eli. TOTECO quijtojtoc: Elis ica ima David ni-quinmanahuis israelitame tlen nopa filisteos huan tlen nochi sequinoc inincualan-caitacahua.”

19 Huan Abner nojquiya quincamahui-to iixhuihua Benjamín. Teipa yajqui altepetl Hebrón quiitato David huan quihuito nochi tlen nopa tlacame ipan tlali Israel tlen iixhuihua Benjamín quinequiyayaj quichihuase. 20 Huan yajque ihuaya Abner 20 tlacame para quiitatij David, huan David quichijqui se hueyi tlacualistli para Abner huan tlen ihuaya hualayayaj. 21 Huan teipa Abner quihui David:

—Na nimocuepas nimantzi huan ni-quisentiliti nochi tlacame ipan tlali Israel para ma quisencahuaca se tlajtolsencahuali mohuaya huan ma mitzchihuaca tlanahuatijquetl. Huan queja nopa tiquin-nahuatis nochi israelitame queja hasta huejcajquiya tijnequiyaya.

Huajca David quinahuatijtejqui, huan Abner yajqui ica cuali.

Joab quimicti Abner

22 Huan sanoc onquistoya Abner quema ajsico nopa tlayacanquetl Joab huan isoldados David. Inijuanti yajtoyaj ipan tlathuijcaoytl huan quihualicayayaj miyac tlamantli tlen quincuilijtoyaj inincualan-caitacahua. Huan Abner ayoc itztoya ihuaya David pampa ya yajtoya ichaj ica cuali. 23 Huan quema ajsicoj Joab huan isoldados tlen hualayayaj ihuaya sequinoc, quihuijque: Abner, icone Ner, quipaxaloco Tlanahuatijquetl David huan David quiseli ica cuali huan quema quinahuatijtejqui para yas, yajqui ica cuali. 24 Huajca Joab nimantzi yajqui quitato David huan quihui:

—¿Tlaque tijchijtoc? Abner hualajqui mitzpxaloco huan tijcahuilijtoc ma cholos tomaco. 25 Cuali tijmati Abner san hualajqui para mitzcajcayahuas. Hualajqui para quitlachilis quejatzca huelis calaquis

ipan toaltepe huan teipa sampa hualas techtehuiqui.

26 Huan huajca Joab quisqui iixpa David huan quintitlanqui soldados para ma quiajsitij Abner huan ma quihuihua ma mocuepa. Huan quiajsitoy nechca nopa ameli Sira, huan quihuijque ma mocuepa huan mocuepqui ininhuaya nopa soldados. Huan David ax tleno quimatiyaya. 27 Huan quema Abner ajsico campa ipuerta altepetl Hebrón, Joab quiyocaquixti para camatis ihuaya ixtacatzi. Huan nozona Joab quicalaquili imachete iijtico Abner huan nimantzi mijqui. Huan quej nopa Joab momacuepqui pampa quimictijtoya iicni, Asael. 28 Huan quema David quimatqui para quimictijtoya Abner quijto: “TOTECO quimati para na huan inijuanti tlen niquinahuatía ax tijhuicaj tlajtlacoli pampa quimictijque Abner tlen eliyaya icone Ner, pampa ax tleno tijmatiyayaj. 29 Yaja Joab tlen quihuica tlajtlacoli ihuaya ichampoyohua. Ax quema ma polihuiocolistli ipan ichaj, niyon ax ma polihuica tlen metzcuchotziti, niyon tlen cuahuactoque, niyon tlen miqij ica mayantli, niyon tlen miqij ipan tlathuijcaoytl.”

30 Huajca queja nopa Joab huan iicni Abisai quimictijque Abner, pampa Abner achtohuiya quimictijtoya iniicni, Asael, ipan ne tlathuijcaoytl tlen oncac ipan altepetl Gabaón.

31 Huajca David quihui Joab huan nochi tlen itztoyaj ihuaya: “Xijzayanaca imoyoyo, huan ximoyoyontica ica tlen fiero huan xijchoquilica Abner.” Huan David yahuiyaya iniica tlen quihucayayaj itlacayo Abner para quitlalpachotij. 32 Huan quitlalpachojque Abner ipan altepetl Hebrón. Huan David chicahuac chocac nopona campa quitlalpachohuayayaj huan nochi tlen itztoyaj ihuaya nojquiya chocaque. 33 Huan David quihuicati Abner ica ni huicatl tlen tlathuel tecueso, quijtohuayaya quej ni:

“¿Para tlen timijqui quej ni, Abner?

Ax quinamiqui.

Timijqui queja se tlaxtejetl.

34 Moma ax cana ilpitoya,

niyon moicxihua ax ilpitoya ica tepos cadena.

Pero timijqui queja miqi se tlen huetzi ininmaco fiero tlacame.”

Huan nochi tlen itztoyaj nozona sampa chochaque.

³⁵Huan David ax tlcuaajqui nopa tonal. Huan hualajque tlacame huan quilhuijque para ma tlcua, pero ax quinejqui. Quinilhui:

—Ma nechtlatzacuilti Toteco intla nijcuas se pantzi o se tlenijqui hasta ixpolihuis tonati.

³⁶Huan nochi nopa israelitame campa hueli quimatque quejatza David tlahuel quichoquili Abner, huan quinpacti. Melahuac nochi tlen David quichihuayaya tepactiyaya. ³⁷Huan queja nopa quimachilijque nochi israelitame ipan nochi altepetini ipan tlali Judá huan ipan tlali Israel para David ax tlanahuatijtoya ma quimictica Abner.

³⁸Huan David quinilhui isoldados:

—Nelfa ama mictoc se tohueyi tlayacanca tiisraelitame. ³⁹Huan yonque TOTECO nechtequitlali nitlanahuatijquetl, ax nijpiya chichahualistli para nijtlatzacuiltis Joab huan Abisai, tlen iconehua Sarvia para niquincuepilis ni tlajtlacoli tlen quichijtoque. Inijuanti tlahuel yoltetique huan tejtetique. Toteco iselti ma quintlaxtlahui ipampa ni tlajtlacoli tlen quichijtoque pampa quimictijque Abner.

Quimictijque Tlanahuatijquetl Is Boset

4 Huan quema quimatqui Tlanahuatijquetl Is Boset tlen eliyaya icone Saúl para Abner mictoya ipan altepetl Hebrón, tlahuel momajmati huan nochi ipan tlali Israel nojquiya moyolmajmatijque. ²Huan itztoyaj ome tlacame ipan itlanahuatilis Is Boset tlen quipiyayaj inintequi para quinyacanase soldados huan yase ipan sequinoc tlaltini tlxtequitij. Se itoca eliyaya Baana huan seyoc Recab, huan inijuanti iconehua Rimón tlen ejqui altepetl Beerot huan eliyaya se iixhui Benjamín tlen huejcajquiya, ³pampa tlacame tlen ejque altepetl Beerot nojquiya eliyayaj iixhuihua Benjamín yonque cholojtejque para itztotij ipan altepetl Gitaim huan mocajque nozona queja san paxalohuani has-ta ama.

⁴(Jonatán, icone Saúl, quipixtoya se icone tlen metzcuachotiyaya tlen itoca Mefi Boset. Metzcuachotixqui ipan nopa tonal quema ajsic tlajtoli tlen altepetl Jezreel para mijqui Jonatán tlen eliyaya itata nopa oquichpil huan Saúl tlen eliyaya ihueyi tata. Ipan nopa tonali nopa oquichpil san quipiyayaya macuili xihuitl, huan se sihuatl tlen quimocuitlahuiyaya quicui-tejqui nopa conetl para cholojque. Huan pampa motlalohuayaya huan moisihuiltiyaya para cholose, nopa conetl huetzito huan mocajqui metzcuachotic.)

⁵Huan nopa tlayacanani Recab huan Baana yajque ichaj Tlanahuatijquetl Is Boset quema tlajcotona huan chichahuac tonayaya, huan yajaya mosiyajcajtoya ipan icuarta. ⁶Mochijque queja quinequiyayaj quiquixtise trigo para quitequihuse, huan ax aqui quinitac. ⁷Pero Baana huan Recab xitlahuac calajque icuarta ne Tlanahuatijquetl Is Boset campa cochtaya huan quicalaquilijque se cuatlamintli tlen huehueyac iijtico huan quimictijque. Huan teipa quiquechtzontejque huan cholojtejque huan quihuicaque itzonteco. Huan nejnenque seyohual para quixcotonque nopa tlamayamitl huan ajsitoj altepetl Hebrón campa itztaya David. ⁸Huan quema ajsitoj, quinxtilijque David Is Boset itzonteco huan quilhuijque:

—Xijtlachili nica timitzhualiquilijtoque itzonteco Tlanahuatijquetl Is Boset, icone Saúl, tlen mitzcualancaitayaya huan quinequiyaya mitzmictis. Huan ama TOTECO quichijtoc ximomacuepa ica Saúl huan nochi iixhuihua.

⁹Huan David quinnanquili Recab huan iicni Baana huan quinilhui:

—Iixpa TOTECO tlen nechmanahujtoc tlen nochi nocuesol, nimechilhuis tlen melahuac. ¹⁰Quema se nechilhuiico para Saúl mictoya huan moilhuiyaya se cuali tlajtoli nechhualiquilijtoc, niquitzqui huan nitlanahuati ma quimictica nozona ipan altepetl Siclag huan queja nopa nijtlaxtlahui ipampa nopa tlajtoli tlen nechmacac. ¹¹¿Huajca ama ax inquitaj achi más monequi nimechchihuilis infiero tlacame pampa inquimictijque ni cuali tlatcatl ipan

ichaj campa cochtoya? Quena, nimech-tlaxtlahuís ipampa tlen inquichijtoque ica Is Boset huan nimechpolihuiltis ipan ni tlaltepectli.

¹²Huan David quinnahuati isoldados ma quinmictica, huan quinmictijque. Huan quintzontequilijque ininma huan iniicxihua. Huan inintlacayo quicuapiloj-que nechca nopa mantoc atl ipan altepetl Hebrón. Huan quitlalpachojque itzonteco Tlanahuatijquetl Is Boset ipan Hebrón ipan nopa mijca ostotl campa quitlalpachojtoyaj Abner.

**David quichijque tlanahuatijquetl
tlen nochi israelitame**

(1 Cr. 11:1-3)

5 Teipa ajsicoj nopa huehue tlacame tlen tlayacanayayaj ipan nochi huej-hueyi familias tlen itztoyaj ipan tlali Israel huan quiitacoj David ipan altepetl Hebrón. Huan quilhuicoj: “Tojuanti tiicnime huan san se toeso. ²Yonque achtohuiya Saúl eliyaya totlanahuatijca, melahuac ta tieliyaya tiitlamocuitlahuijca huan elqui ta tlen nelía titechyacananaya para titlate-huise. Huan ama TOTECO mitzilhuijtoc para ta tielis totlamocuitlahuijca huan totlanahuatijca tiisraelitame.”

³Huajca nozona David quichijqui se tlajtolsencahuali iixpa TOTECO ica nochi nopa huehue tlacame tlen tlali Israel. Huan injuanti quialtijque David ica aceite huan quitequitlalijque para elis tlanahuatijquetl tlen nochi israelitame. ⁴Huan David quipiyayaya 30 xihuitl quema pejqui tlanahuatía huan tlanahuati 40 xihuitl. ⁵Achtohui para chichome xihuitl huan tlaj-co mosehui ipan altepetl Hebrón huan quinnahuati san nopa israelitame ipan tlali Judá. Huan teipa mosehui ipan altepetl Jerusalén para 33 xihuitl huan quinnahuati nochi israelitame ipan tlali Judá huan ipan tlali Israel.

**Jerusalén mochijqui
nopa tlayacanca altepetl**

(1 Cr. 11:4-9)

⁶Huan quema nopa tlayacanani quial-tijque David para elis inintlanahuatijca,

David huan nochi isoldados yajque altepetl Jerusalén para quinquixitij nopa jebuseos tlen itztoyaj nozona. Pero injuanti quihuihuiitaque huan quitlalijlhuijque David: “Ta ax quema huelis ticalaquís nica. Hasta tlen popoyotzitzi huan tlen metzcuaachome mitztzacuilisquíaj para ax huelis ticalaquís.”

Queja nopa quijtojque pampa moil-huijque para David ax huelis calaquís.

⁷Pero David huan isoldados tlatlanque huan moaxcatijque campa nelpano tilahuac huan temachtli nopa tepamitl ipan tepetl Sion, huan ama nochi quitocajtijaj nopa barrio ipan Jerusalén ica Ialtepe David. ⁸Huan quej ni David quitlanqui nopa altepetl. Nopa tonal quema David quicaj-qui quitlalijlhuíaj, quinilhui isoldados: “Nochi tlen inquinequij inquitehuise nopa jebuseos, xicalaquica ipan nopa hueyi tubo campa calaqui atl ipan inialtepe. Huan queja nopa inajsitij campa itztoque huan inquinmictise nopa mosisinijca tla-came tlen quinequij techtlanise tlen injuanti quintocajtijaj nopa ‘popoyotzitzi huan metzcuaachome’. Tlahuel niqincua-lancaita.” Ica ni pejqui nopa tlajtoli tlen ama quijtohuaj campa hueli: “Tlen popoyotzitzi huan tlen metzcuaachome ax hueli calaquise ipan ichaj Toteco, pampa queja nopa quintocajtiyayaj nochi nopa tlacame tlen quinhueyichihuayayaj tlaixcopincayome queja quichihuayayaj nopa jebuseos.”

⁹Huan David mochansehui ipan nopa barrio ipan Jerusalén nechca campa quipixqui itepa nelpano tilahuac huan temachtli huan quitocajtlalijtoya Ialtepe David. Huan quiquetzqui seyoc tepamitl yahualtic ichaj huan ichaj pejqui nozona ipan nopa altepetl tlen itoca Milo huan yajqui hasta más calijtic tlen nopa altepetl.

**Hiram quintitlanqui tlacame
campa David**

(1 Cr. 14:1-2)

¹⁰Huan David más mohueyichijtiyo-huiyaya pampa TOTECO Dios Tlen Quinyacana Ielhuicac Ejcahua Ma Tlatlanitij itz-

toya ihuaya. ¹¹Huan Tlanahuatijquetl Hiram tlen quinahuatiyaya altepetl Tiro quititlanili David huejhueyi tlacame para ma quipaxalotij David. Huan ininhuaya quititlanqui miyac tiocuahuítl, huan cuaximani huan calchihuani tlen quimatiyayaj quitejtequij tetl para quichihuilise David se hueyi cali. ¹²Huan David momacac cuenta para elqui TOTECO tlen quitequitlaltijtoya para elis inintlanahuatijca israelitame. Huan quimachili para yajaya TOTECO tlen tlahuel quihueyitlaltijtoya itlanahuatilis huan quichijqui pampa TOTECO tlahuel quinicnelía nopa israelitame huan quintlapejpenijtoya para iaxcahua.

Sequinoc iconehua David

(1 Cr. 3:5-9; 14:3-7)

¹³Huan quema David quipatlatoya ichaj tlen altepetl Hebrón hasta Jerusalén, mocuili más isihuahua huan iompaca sihuajhua, huan tlatatque más iconehua; oquichpilme huan sihuapilme. ¹⁴Ya ni iconehua David tlen tlatatque ipan altepetl Jerusalén: Samúa, Sobab, Natán, Salomón, ¹⁵Ibhar, Elisúa, Nefeg, Jafia, ¹⁶Elisama, Eliada huan Elifelet.

David quintlanqui nopa filisteos

(1 Cr. 14:8-17)

¹⁷Huan quema nopa filisteos quicajque para israelitame ipan tlali Israel nojquiya quialtijtoyaj David para elis inintlanahuatijca, yajque ica nochi ininsoldados para quíitzquise. Huan David quicajqui para hualayayaj filisteos, huajca yajqui motlaltito ipan altepetl Jerusalén ipan nopa cuarto campá más tilahuac itepa huan cuali tzactoc. ¹⁸Huan nopa filisteos hualajque huan mosejsemanque ipan nochi nopa tlamayamitl tlen itoca Refaim nechca Jerusalén. ¹⁹Huajca David momajito ica TOTECO huan quíilhui:

—¿Tijnequi ma niyas niquintehuiti ni filisteos? ¿Tinechmactilis nomaco para niquintlanis?

Huan TOTECO quíilhui:

—Quena, xiquintehuiti huan temachtli na nimitzmactilis nochi momaco.

²⁰Huajca David nisqui huan quinte-

hui nopa filisteos huan quintlanqui. Teipa quitocajtlali nopa lugar Baal Perazim tlen quinequi quíijos “ojtlapojtoc” pampa quíijo: “TOTECO chicahuac ajisitoc ica nocuailancaitacahua queja chicahuac quisa atl campá quitlapohua se aojtli.” ²¹Huan nopa filisteos cholojque huan quicajtejqe inintiotzitzu huan David ica isoldados quintlatijque.

²²Huan teipa nopa filisteos sampa mocuepque huan mochihuacoj campá itztoyaj achtohuiya ipan nopa tlamayamitl Refaim. ²³Huan sampa David quitlajtlaní TOTECO tlaque ipaquilis. Huan TOTECO quíilhui:

—Quena, pero amo xiya xiquinnami-quitl campá iniixmelac. Achtohui xiquinyahualoca ixtacatzu huan xiquisaca xiquintehuitij campá nopa cuatini balsameras. ²⁴Huan quema inquicaquise tlahuejchihualistli huejcapa ipan ixihuiyo nopa balsameras queja soldados tlen tlacacapatzaj ica iniicxipa, huajca nimantzi xiquintetzopaca, pampa nopa caquistli quinequi quíijos para na niqüstoc para nimechycanas inquintlanise nopa filisteos.

²⁵Huajca David quichijqui senquistoc queja TOTECO quinahuatijtoya huan yajaya ininhuaya isoldados pejque quinmictíaj nopa filisteos tlen altepetl Gabaón huan ajsito hasta altepetl Geser.

David quinejqui quihualicas icaxa TOTECO ipan Jerusalén

(1 Cr. 13:5-14)

6 David sampa quinsentili tlen más tlapajpenilme tlen nochi israelita soldados huan mochijque 30 mil soldados. ²Huan nochi injuanti quíistejqe ihuaya David para yase ipan altepetl Baala ipan tlali Judá. Yajque para quihualicase icaxa Toteco Dios. Nopa caxa tlen quihuica itoca TOTECO tlen quinyacana ielhuicac ejcahua ma tlatlanitij huan tlen mocahua itzonixco nopa ome querubines tlen eltoque itzonixco nopa caxa. ³⁻⁴Huan quíixitijque icaxa Toteco Dios tlen eltoya ipan se tepetl ipan ichaj Abinadab huan quitlaltijque ipan se cuacarro yancuic. Huan Uza huan Ahío iconehua Abinadab

quihuicaque nopa cuacarro tlen quihuicayaya icaxa Toteco Dios. Huan Ahío tlacantiyohuiyaya. ⁵Huan David huan nochi nopa israelitame quitoquilijtiyohuiyayaj. Huan mijtotijtiyohuiyayaj ica miyac paquilistli. Huan huicatiyohuiyayaj iixpa TOTECO ica nochi tlamantli tlatzotzonali queja arpas, salterios, panderos, flautas huan címbalos.

⁶Quema ajsitoj campá itrigo mil Nación, nopa huacaxme tlen quihuicayayaj nopa cuacarro motepotlamijque, huan Uza momatlalanqui para qitzacuilis icaxa Toteco Dios para ax huetzis. ⁷Huan TOTECO tlhuel cualanqui ica Uza pampa ax quiimacasqui quitzquis icaxa huan quimicti nozona nechca nopa caxa.

⁸Huan David tlhuel mocueso ipampa tlen quichijtoya TOTECO ica Uza huan quitocajti nopa lugar Pérez Uza. (Pérez Uza quijtosnequi Campa Toteco Cualanqui Ica Uza.) Huan hasta ama queja nopa itoca. ⁹Huan David quiimacasqui TOTECO nopa tonal huan quijto: “¿Quejatza huelis nijhuicas icaxa TOTECO campá niitztoc?” ¹⁰Huajca ayoc quinejqui quihuicas icaxa TOTECO ipan Jerusalén campá itocaltepe David, huan tlanahuati ma quihuicaca ichaj Obed Edom tlen achtohui ejquetl ipan altepetl Gat pero ama quipixqui ichaj nechca campá eltoya nopa caxa. ¹¹Huan nozona mocajqui icaxa TOTECO eyi metztlí, huan TOTECO miyac quitiochijqui Obed Edom huan nochi ichaj ehuaní.

David quihuicac icaxa TOTECO ipan Jerusalén

(1 Cr. 15:1 – 16:6)

¹²Teipa quema David quimatqui para TOTECO miyac quitiochijtoya Obed Edom pampa quipixqui icaxa, yajqui nozona, huan ica miyac paquilistli quiquixti icaxa Toteco Dios huan quihuicac ipan nopa barrio tlen itoca Ialtepe David. ¹³Huan quema nopa tlacame tlen quihuicayayaj icaxa Toteco Dios quimajcaytoya iniixi chicuase hueltas, moquentzque huan mochixque huan David quitenzajqui se toro huan se becerro tlen tomahuac queja tlacajcahuallistli para Toteco Dios.

¹⁴Huan David mijtotiyaya ica nochi ichicahualis iixpa TOTECO huan moyoyontijtoya queja ininyoyo totajtzitzi. ¹⁵Huan queja nopa David huan nochi nopa israelitame quihuicatiyajque icaxa TOTECO ica miyac paquilistli. Huan ininhuaya yajque tlen tlapitztiyajque.

¹⁶Huan quema icaxa TOTECO quiaxitiytihualayayaj ipan Ialtepe David, tlachiya-yaya ipan ventana Mical, isihua David tlen eliyaya icone Saúl, huan quitac para Tlanahuatijquetl David huitontihualayaya huan mijtotijtihualayaya huan tlhuel quicalancaitac ipan iyolo.

¹⁷Huan quicalaquijque icaxa TOTECO ipan se yoyon cali tlen David quicaltalijtoya para ya nopa. Huan David quimacac tlacajcahuallistli TOTECO tlen tlatlatili huan tlacajcahuallistli para ma onca tlayoltlalili ihuaya TOTECO. ¹⁸Quema tlanqui quitencahua nopa tlacajcahuallistli, David quintiochijqui nochi nopa israelitame ipan itoca TOTECO, yajaya tlen quinyacana ielhuicac ejcagua ma tlatlanitij. ¹⁹Huan quinmajmacac nochi Israelita tlacame huan sihuame sesen pantzi huan vino, huan se torta tlen xocomecatl huactoc. Teipa quema tlantoya nochi nopa ilhuítl, nopa tlacame huan sihuame mocuepque ininchajchaj.

²⁰Huan David nojquiya mocuepqui ichaj para quintiochihuas ichaj ehuaní. Huan Mical, isihua tlen eliyaya icone Saúl, quisqui huan quinamiquico ihuehue huan quihuhuiitac, huan quiilhui:

—Fiero tinesiyaya ama, ta tlen titlanahuatijquetl ipan Israel. Timonextijtoc iniixpa imoichpoca latequipanojchua queja tlen hueli tlatatl, pampa timoquixtli motlaque tlen huehueyac tlen tlanahuatijquetl.

²¹Huan David quinanquili:

—Nochi nijchijtoc ica nochi noyolo para nipaquis iixpa TOTECO pampa yajaya nechtlapejpenijtoc para nimocahuas nitlanahuatijquetl tlen itlacajhua ipatlaca motata huan ifamilia, huajca yeca nimijtotijtoc iixpa. ²²Huan intla ninesis noja más nihuihuitc moixpa pampa nimoicnonequi iixpa ya, ax tleno para na. Sequinoc nech-

hueyitlepanitase pampa nimoicnonejqui iixpa TOTECO hasta nojquiya nechhueyitlepanitase nopa ichpoca tequipanohuani tlen ininca ticamati.

²³Huan TOTECO quichijqui Mical, icone Saúl, ax quema ma conepeya hasta mijqui.

**David quinequi quichihuas
itiopa Toteco Dios**

(1 Cr. 17:1-27)

7 Huajca teipa David mosehui ipan nopa caltlanahuatili huan ayoc quisayaya para tlatehuis pampa TOTECO quimacac tlasehuilistli ica nochicualancaitacahua. ²Huan David quihui nopa tiocamanalojquetl Natán:

—Na nimopantía ipan se cali yejyetzzi huan icaxa Toteco Dios eltoc ipan se yoyon cali.

³Huan Natán quinanquili:

—Xijchihua nochitlen tiquita cuali para tijchihuas, pampa TOTECO itztoc mohuaya.

⁴Huan nopa yohuali TOTECO quinojnotzqui Natán huan quihui:

⁵“Xiya xiquilhuiti notlatequipanojca David para yajaya ax quichihuas se cali campa niitztos. ⁶Ax quema nimopantijtoc ipan se caltiopamitl hasta nopa tonal quema niquinquixti imohuejcapan tatahua ipan tlali Egipto huan hasta ama. Nochipa nimopantijtoc ipan se yoyon cali. ⁷Ninejnenqui ininhuaya israelitame campa hueli pero ax quema nijtlajtlanjtoc se tlayacanquetl tlen nijtlaljtoc para quinmocuitlahuise notlacajhua para ma nechchihuili se caltiopamitl tlen tiocahuaitl.

⁸“Xiquilhui David para na niitTECO Tlen Niquinyacana Noelhuicac Ejcahua ma tlatlanitij huan niquilhuía ya ni: ‘Na nimitztlapejpenijtoc para tielis tlanahuatijquetl ipan noisraelita tlacajhua quema tieliyaya se tlamocuitlahuijquetl tlen borrejme. ⁹Na nimocajtoc mohuaya campa hueli campa tinemiyaya, huan mocualancaitacahua na niquintzontlamiltijtoc. Nimitzchihuas noja más tihueyi hasta tielis hueyi queja nopa tlacame tlen más motlepanitaj ipan ni tlatepac-

tli. ¹⁰Huan nojquiya niquintlapejpenijtoc se tlali campa niquintlalis noisraelita tlacajhua. Huan nozona itztose ipan se tlali tlen iniaxa huan ayoc aqui quincualancamacas. Huan tlen fierojtique ayoc quintlajiyohuiltise queja quichihuayaj achtohuiya ¹¹ipan nopa tonal quema niquintlali jueces ma quinyacana noisraelita tlacajhua. Huan nijchihuas para tiitztos ica yejyetzzi ica mocualancaitacahua.

“Pero na tlen nimoTECO nimitzilhuía para ax ta tlen tinechchihuilis nochaj, pero elis na tlen nimitzchihuilis ta, David, se cali tlen tlanahuatiani huan se tlanahuatistli tlen mocahuas para moteipa ixhuhua. ¹²Huan quema timiquis huan timosiyajcahuas ica motatahua, na nijtlalis se mocone tlen quisas tlen moxinajcho para tlanahuatis huan itlanahuatilis nijchihuas temachtli. ¹³Huan yajaya tlen mocone, quena, nechchihuilis se caltiopamitl huan nijchihuas temachtli itlanahuatil para nochipa. ¹⁴Huan na nielis queja itata huan yajaya elis queja nocone. Huan intla yajaya nechixpanos, na nijtlatzacuilit queja se tetaj quichihua ica icone. Quena, niquintequihuis tlacame tlen sequinoc taltini para ma quitlatzacuilitca nopampa na. ¹⁵Pero nochipa nijpiyas hueyi noyolo ica ya. Ax quema nijtlahuelcahuas queja nijtlahuelcajqui Saúl tlen achtohui elqui tlanahuatijquetl huan nijquixti para nimitztlalis ta titlanahuatis. ¹⁶Huan na niquintlalis moteipa ixhuhua para quipiyase tlanahuatili para nochipa noixpa. Quena, motequiticayo tlen tlanahuatijquetl nimitzmacatoc para nochipa huan nochipa se moteipa ixhui tlanahuatis.”

¹⁷Queja nopa TOTECO quihui Natán ipan se tlanextili para ma quihuis David. Huan Natán yajqui huan quihuito David nochitlen TOTECO quihuijtoyta.

David quihueyitlali

huan quitlascamatqui TOTECO

¹⁸Huan Tlanahuatijquetl David yajqui campa nopa Yoyon Tiopamitl huan motlali iixpa TOTECO huan quijito:

“TOTECO, ta tlen tijpiya nochi tlanahuatili, na ax tleno nopati. Niyon nofamilia ax hueyi para tinechhueyichijtoc queja tijchijtoc. ¹⁹Huan ax san ya nopa tlen ya tijchijtoc, pero nojquiya tiquijtojtoc para noteipa ixhuihua tlanahuatise para nochipa. TOTECO, ax aqui seyoc tlen quiapiya hueyi iyolo queja ta tijpiya ica na.

²⁰“Huan ¿tlaque más huelis nimitzil-huis para nimitztlascamatis? TOTECO, ta tlen tijpiya nochi tlanahuatili, ta cuali tiquixmati noyolo. ²¹Ica mopaquilis tijchihua nochi ni huejhueyi tlamantli queja tiquijtojtoc tijchihuas, huan nochi tijchijtoc pampa hueyi moyolo. Huan tinechilhui para ma nijmati na tlaque tijchihuas teipa.

²²“TOTECO, ta tlen tijpiya nochi tlanahuatili, tlahuel tihueyi. Ax quema tijcactoque tlen seyoc queja ta. Axaca seyoc Dios; ta tiyojtz. ²³Huan ax onca seyoc tlali itlacajhua tlen quiselijtoque tlaticohuali queja ta titechtiocijtoc tiisraelitame tlen titechchihuilijtoc timotlacajhua. Ta, Toteco Dios, tlen titechquixti ipan tlali Egipto huan tiquintojtoc toxpa sequinoc tlali ehuan ica inintiotzitz, pampa titechicnelía. Titechchihui huejhueyi tlanextilijcayotl nepa iniixpa nopa Egipto ehuan. Huan nochi tijchijqui para ma mohueyitlali motoca ta. ²⁴Pampa, TOTECO, ta tiquijtojtoc para titechtlapejpenijtoc tiisraelitame para ma tielica timotlacajhua para nochipa huan ta timochijtoc toDios tojuanti.

²⁵“Huajca TOTECO Dios, temachtli xijchihua tlen tiquijtojtoc titechchihuilis. Xijchihua para notlanahuatil huejcahuas huan para se noteipa ixhui nochipa tlanahuatis moixpa queja tiquijtojtoc. ²⁶Nochi tlacame ma mitzhueyichihuaca para nochipa. Huan ma nochi quijtojtoca: ‘TOTECO, Ta Tlen Tiquinyacana Nochi Moelhuicac Ejcahua Ma Tlatlanitij, ta tlen toDios tiisraelitame.’ Huan para nochipa temachtli xijcahuili se noteipa ixhui ma mosehui queja molanahuatijca moixpa.

²⁷“Pampa ta, TOTECO, Tlen Tiquin-

yacana Moelhuicac Ejcahua Ma Tlatlanitij, tijpiya nochi chicahualistli huan ta titoTeco nochi tiisraelitame. Tinechilhujtoc para tijchihuas temachtli notlanahuatilis huan yeca na, nimotlatequipanojca, nimomajtojtoc quej ni para nijselis tlen tinechilhujtoc. ²⁸Ta tiTOTECO Dios, ta tlen nelnelía tiDios. Huajca melahuac nopa tlen cuali tlen tiquijtohua tinechchihuilis. Ta tiquijtojtoc para tinechchihuilis se nochaj tlen tlanahuatiani tlen huejcahuas ica se noteipa ixhui tlen tlanahuatis para nochipa. ²⁹Huajca xijchihua tlen tiquijtojtoc. Huan ama xinechtiochihua huan xiquintiochihua noconeua huan noteipa ixhuihua para nochipa, pampa queja nopa, ta TOTECO Dios, noca timocajtoc para tijchihuas. Huan pampa tinechtiochijtoc, notlanahuatilis huan noteipa ixhuihua tlen tlanahuatise elise tlaticohualme para nochipa.”

David tlatlanqui campa hueli

(1 Cr. 18:1-13)

8 Huan teipa David quintlanqui nopa fisteeo tlacame huan quinicnotlali. Moaxcati nopa altepetl Gat tlen eliyaya inialtepe tlen más hueyi.

²Nojquiya quintlanqui moabita tlacame huan quinchijqui para ma motecaca tlalchi nejnechca se ilado seyoc. Huan quinyejyecoque ica ihuehuyaca se mecatl. Huan teipa quinyejyecoqtijayque sampa ica nopa mecatl, huan nopa tlacame tlen inintlacayohua mocajque ipan nopa ompa mecatl ihuehuyaca quinnictijque. Huan tlacame tlen inintlacayohua mocajque ipan nopa expa mecatl, quincahuilijque ma itztoca. Huan nopa moabitam tlen mocajque yoltoque elque itlatequipanojcahua David huan quitlaxtlahuijque impuestos.

³Huan nojquiya David quitlanqui Tlanahuatijquetl Hadad Ezer tlen elqui tlanahuatijquetl ipan altepetl Soba huan eliyaya icone Rehob. Quitlanqui quema yahuiyaya para sampa moaxcatis nochi nopa tlali nechca atemilt Eufrates. ⁴Huan ipan nopa tonal David quinitzqui mil 700 isol-

dados tlen yahuiyayaj cahuayojtipa huan 20 mil tlen icxinejnemiyayaj huan quinhuicac ilpitoque. Huan nojquiya quincocohuilijque sese iniicxi nochi nopa cahua-yojme tlen quihuicayayaj nopa tlatehuijca carros. San quincajqui cuali nopa cahua-yojme tlen monejqui para quitlanase san 100 tlatehuijca carros.

⁵Huan quema hualajque sirios tlen altepetl Damasco para quipalehuisquíaj Hadad Ezer, nopa tlanahuatijquetl tlen altepetl Soba, David nojquiya quinmicti 22 mil tlen injuanti. ⁶Huan David quintlali miyac soldados para tlamocuitlahuise ipan nopa sirios ipan altepetl Damasco. Huan nopa sirios mocajque itlatequipanojcahua David huan sesen xihuitl quitlaxtlahuiyayaj impuestos. Huan TOTECO quipalehui David campa hueli campa ya yahuiyaya.

⁷Huan David quincuili nojquiya ininyolixtzajcahua tlen itlayacanca soldados Hadad Ezer quihuicayayaj iniixpa huan nochi eliyaya oro. Huan David nochi quihuicac ipan altepetl Jerusalén. ⁸Huan nojquiya Tlanahuatijquetl David quicuic tlahuel miyac tlamantli tlen bronce ipan altepetini Beta huan Berotai tlen quinahuatiyaya Hadad Ezer.

⁹Quema Tlanahuatijquetl Toi ipan altepetl Hamat quimatqui para David quintlanqui nochi isoldados Hadad Ezer, ¹⁰quititlanqui itelpoca tlen itoca Joram para quipaxalos ica yejyetzzi huan quihueyitlalis David pampa quitlantoya Hadad Ezer tlen eliyaya nojquiya icualanca-itaca. Huan Joram quihuiquili David miyac tlamantli tlen oro, plata huan bronce.

¹¹Huan Tlanahuatijquetl David quiiyocatlali nochi ni tlamantzitzi para TOTECO queja nojquiya quiiyocatlalijtoya para TOTECO nochi oro huan plata tlen tequixtilijtihualajtoya ipan campa hueli altepetini tlen quitlantihualajtoya. ¹²Quinquixtilijtoya miyac tlamantzitzi tlen nopa sirios, moabitame, amonitame, filisteos, huan amalecitame. Huan nochi quimacac Toteco queja nojquiya quiiyocatlali para ya nochi tlen quicuiliijtoya Hadad Ezer, nopa tlanahuatijquetl tlen Soba.

¹³Huan queja nopa David mochijqui hueyi campa hueli. Huan quema mocuepqui tlen nopa tlatehuijca-yotl, David quinmicti 18 mil edomitame ipan nopa Tlamayamitl tlen Istatl.

¹⁴Huan David quintlali miyac soldados para tlamocuitlahuise ipan tlali Edom. Huan nochi nopa Edom ehuani mochijque itlatequipanojcahua David, pampa TOTECO quipalehuiyaya David campa hueli yahuiyaya para ma tlatlani.

Itlayacancahua David

(2 S. 20:23-26; 1 Cr. 18:14-17)

¹⁵Huan David tlanahuati ipan Israel huan quichijqui tlen xitlahuac huan tlen cuali ica nochi itlacajhua. ¹⁶Huan Joab, icone Sarvia, eliyaya nopa tlayacanquetl tlen isoldados David. Huan Josafat, icone Ahilud, tlen quiijuicojtiyajqui tlen panoc mojmostla ipan itlanahuatilis David. ¹⁷Huan Sadoc, icone Ahitob, huan Ahimelec, icone Abiatar, eliyayaj totajtzitzi. Huan Seraías eliyaya itlajcuilojca David. ¹⁸Huan Benaía, icone Joiada, quinnahuatiyaya nopa soldados tlen quimocuitlahuiyayaj David huan tlen motlahuayayaj para quihuicase se tlajtoli quema quititlaniyaya para seyoc lugar. Huan iyoca tlen Benaía, David quinpixqui itelpocahua para itlapalehuijcahua tlen más huejhueyi.

David huan Mefi Boset

9 Se tonal David tlajtlani: “¿Ax mocajtoc yoltoc niyon se ichaj ehuani Saúl para huélis nijpalehuis ipampa iteicnelil mijcatzi Jonatán tlen tlahuel niqicneliyaya?”

²Huan quipanti se tlatatl tlen tlatequipanojtoya ipan ichaj Saúl tlen itoca eliyaya Siba. Huajca quinzotzque para yas iixpa Tlanahuatijquetl David. Huan quema ajsito David quiihlui:

—¿Ta tiSiba?

Huan quinanquili:

—Quena.

³Huajca David quiihlui:

—¿Ax mocajtoc yoltoc se acajya tlen ifamilia Saúl tlen huélis nijnextilis itlaicnelijcayo Toteco Dios?

Huan Siba quinanquili:

—Mocajtoc se icone Jonatán tlen ax hueli nejnemi pampa metzcuachotic ipan nochi ome iicxihua.

⁴Huan David quitlajtlani Siba canque itztoc. Huan Siba quiilhui para itztoc ipan altepetl Lodebar ipan ichaj Maquir, icone Amiel. ⁵⁻⁶Huajca David nimantzi tlanahuati ma quihualicaca Mefi Boset icone mijcatzi Jonatán huan iixhui mijcatzi Saúl. Huan quema Mefi Boset ajsico iixpa David, motlancuaquetzqui ica miyac tlatlepanitacayotl.

⁷Huan David quiilhui:

—Amo ximajmahui. Na nelía nijnequi nimitzpalehuis huan nimitzchihuilis tlen cuali pampa tlhuel niquicneli motata Jonatán. Na nimitzcuepilis nochi nopa tlali tlen eliyaya iaxca mohueyi tata Saúl huan ta tiitztos nica ipan nochaj huan nochipa titlacuas nohuaya.

⁸Huan Mefi Boset mohuijtzonqui tlatlchi ica tlatlepanitacayotl. Huan teipa quiilhui David:

—Na ax nitleno para tlhuel tinechtla-sojtlas. Niitztoc queja san se chichi tlen mictoc.

⁹Huan teipa David quinzotzqui Siba itlatequipanojca Saúl huan quiilhui:

—Nochi tlen eliyaya iaxca moteco Saúl huan nochi ichaj ehuani ama nijmactilijtoc Mefi Boset tlen itztoc iixhui. ¹⁰Huan ta, moconehua huan motlatequipanojcahua intequitise ipan nochi itlal para oncas tlen monequi para ichaj ehuani, pero Mefi Boset tlacuas mojmotla ipan nomesa nohuaya.

Huan Siba quinpixtoya 15 iconehua huan 20 itlatequipanojcahua. ¹¹Huan Siba quiilhui Tlanahuatijquetl David:

—Nimotlatequipanojca nijchihuas nochi tlen tinechilhujtoc ma nijchihua.

Huajca Mefi Boset itztoc ipan ichaj Tlanahuatijquetl David huan tlacuajqui ihuaya queja elisquía se icone. ¹²Huan Mefi Boset quipixtoya se ioquichpil tlen itoca eliyaya Micaía. Huan nochi ichaj ehuani Siba quitequipanohuayaj Mefi Boset. ¹³Pero Mefi Boset tlen metzcuachotic ipan nochi ome iicxihua mocajqui para

itztos nozona ipan altepetl Jerusalén huan nochipa tlacuayaya ihuaya Tlanahuatijquetl David.

Tlatehujicayotl ica sirios huan amonitame

(1 Cr. 19:1-19)

10 Huan quema panotoya tonali, mijqui inintlanahuatijca nopa amonitame huan Hanún icone mocajqui tlanahuatijquetl ipan itlanahuatilis. ²Huan David quijto: “Na nijchihuas tlen cuali ica Hanún, icone Nahas, queja itata quichijqui tlen cuali ica na.” Huan David quintitlanqui tlacame para ma quiyoltlalitij pampa mijqui itata. Huan quema ajsitoj ipan inintlal amonitame, ³nopa tlayacananani tlen quipalehuiyayaj Tlanahuatijquetl Hanún quiilhuique: “¿Para tlen timoilhuía David quintitlantoc ni tlacame para mitzyoltlalise pampa mijqui motata? Ax ya nopa. Quintitlantoc para ma quixmatiquij cuali totlal huan teipa techtehujij huan techtlanise.”

⁴Huajca Hanún quinzotzqui itlatitlanilhua David huan quinzotzqui san se lado ipan inintento huehueyac para quinpinahualtis. Huan nojquiya quinzotzquijque ininyoyo huehueyac hasta inintzinpa, huan quinmajcaque para ma mocuepaca. ⁵Huan quema quimatqui David tlen quinchihuiliytoyaj itlatitlanilhua, quintitlanqui tlacame para ma quinnamiquitij. Huan quinihuitoj ma mocahuaca ipan altepetl Jericó hasta quema moscaltis huehueyac inintento huan huajca mocuepase, pampa tlhuel tepinajti queja quinchijtoyaj.

⁶Huan quema nopa amonitame quimachilijque para quicalancamacatoyaj David, quintlaxtlahujque 20 mil sirio tlacame tlen icxinejnemiyayaj tlen hualajque tlen tlali Bet Rehob huan altepetl Soba. Huan quintlaxtlahujque se mil tlacame ma hualaca ica nopa tlanahuatijquetl tlen Maaca huan 12 mil tlacame ma hualaca tlen Is Tob. ⁷Huan quema David momacacuenta tlen quichihuayaya, quititlanqui icapitán, Joab ica nochi soldados tlen más tetique. ⁸Huan nopa amonitame mo-

tlalijque para quimocuitlahuise nopa cuapuerta ipan itepa inialtepe. Huan nochi nopa sirio tlacame tlen hualajque tlen Soba, Is Tob huan Maaca mochijque quentzi huejca tlen nopa altepetl ipan tlamayamitl.

⁹Huan quema Joab quitac para oncac quinpixtoya icualancaitacahua, quiniyocatlali nopa israelita soldados tlen más tlapejpenilme para yase ihuaya ya huan quintehuise nopa sirios. ¹⁰Huan nopa sequinoc soldados quincajtequi ihuaya iicni, Abisai, para ma quintetzopaca nopa amonitame. ¹¹Huan Joab quiilhui iicni, Abisai: “Intla tiqita para nopa sirios nechtlanisnequij, xinechpalehuiqui. Huan intla na niquitas para nopa amonitame mitztlanisnequij, na nimitzpalehuis. ¹²Ximosemaca huan ximotemaca para titlatehuise chicahuac para tijmanahuise total huan toaltepehua tiitlacajhua Toteco Dios. Huan TOTECO ma quichihuas tlen ipaquilis ipan ni tlatehuijcyotl.”

¹³Huajca Joab huan nochi isoldados monechcahuijque para quintehuise nopa sirios, huan nopa sirios cholojtejque. ¹⁴Huan quema nopa amonitame quitaque para nopa sirios cholohuayayaj, ini juanti nojquiya cholojtejque iniixpa Abisai huan isoldados, huan sampa calajque para motlatise ipan inialtepe. Huan Joab huan nochi isoldados mocuepque para ininchaj ipan altepetl Jerusalén.

¹⁵Huajca nopa sirios momacaque cuenta para ax yajatij para moixnamiquise ininhuaya nopa israelitame. Huan sampa mocualtlalijque para tlatehuise, ¹⁶huan hualajqui Hadad Ezer para quinpalehuis. Yaja eliyaya tlanahuatijquetl ipan altepetl Soba. Huan Hadad Ezer tlatitlantoya para ma hualaca nopa sequinoc sirios tlen itztoyaj ipan seyoc nali atemitl Éufrates huan nochi ini juanti ajsicoj ipan se lugar tlen itoca Helam. Huan ni soldados quinyacanayaya Sobac tlen eliyaya capitán tlen isoldados Hadad Ezer. ¹⁷Huan quema David quiilhuijque tlen nopa sirios quichihuayayaj, sampa quinsentili nochi israelita soldados huan apaque atemitl Jordán huan yajque Helam.

Huan nopa sirios mocualtlalijque huan quitehuijque David ihuaya isoldados. ¹⁸Huan nopa sirios sampa cholojtejque iixpa isoldados David. Huan David quimicti 700 sirios tlen yahuiyayaj ipan tlatehuijca carros, huan 40 mil tlen nemiyayaj cahuyoytipa. Nojquiya quicoco Sobac tlen quinyacanayaya isoldados Hadad Ezer huan nozona mijqui. ¹⁹Huajca nochi nopa tlanahuatiani momacaque cuenta para ax yajatij ica tlali Israel. Yeca motemacaque ica Israel huan quichijque se tlajtolsencahuali ininhuaya para quintequipanose. Huajca nopa sirios ayoc motemacayayaj quinpalehuise nopa amonitame iixpa David pampa majmahuiyayaj.

Itlajtlacol David

11 Huan teipa quema pejqui yancuic xihuitl, ipan nopa tonal quema nochi tlanahuatiani momatij quisaj para tlatehuitij, David san quititlanqui Joab huan nopa israelita soldados ma tlatehuitij. Huan quiyahualotoj altepetl Rabá huan pejqui quintehuáj nopa amonitame. Pero David mocajqui ipan Jerusalén.

²Huan se tiotlac David mejqui campa mosiyajcajtaya huan pejqui paxalohua calpani icaltlanahuatil. Huan quitac se sihuatl tlen maltiyaya ipan seyoc calpani. Huan David quiitac para tlahuel yejyectzi eliyaya. ³Huajca tlajtlani tlaque itoca ne sihuatl, huan quiilhuijque para itoca Betsabé huan eliyaya icone Eliam huan isihua Urías, se heteo tlacatl. ⁴Huan David tlatitlanqui para ma quinoztaca nopa sihuatl huan ma quihualiquilica. Huan Betsabé hualajqui huan David cochqui ihuaya. Huan teipa nopa sihuatl mopajpajqui queja quijtohuayaya itlanahuatilhua Moisés para monequi quichihuas se tlen ya nopa quichijtoc huan mocuepqui ichaj. ⁵Huan teipa momacac cuenta para quiconemacatoya David huan quititlanili se amatlajcuiloli para ma quimati David.

⁶Huan David quitlajcuilhui Joab para ma quititlanili Urías, nopa heteo tlacatl tlen eliyaya ihuehue Betsabé, pampa Urías eliyaya se isoldado David. Huan Joab quititlanqui Urías ma yas ichaj David.

7 Huan quema Urías ajsico ichaj David, David quitlajtlaní quejatza itztoc Joab huan isoldados, huan tlaque oncatoc ipan ne tlathuijcaoytl. 8 Huan teipa David quiilhui:

—Xiya mochaj, huan ximalti huan ximosiyajcahua.

Huan quema quistoya, David quititlaní se tlacualistli tlen cuali queja se regalo. 9 Pero Urías ax yajqui ichaj. Yaja san cochqui nechca puerta ipan icaltlanahuatil David campa cochij itlatequipanojcahua. 10 Huan quiilhuijque David:

—Urías ax yajqui cochito ichaj.

Huajca David quinotzqui Urías huan quiilhui:

—¿Para tlen ax ticochito mochaj? Pampa ya huejcajtoc para ax ticochtoc ipan mochaj.

11 Huan Urías quinanquili:

—Icaxa Toteco, huan noteco Joab, huan nochi israelita soldados tlen tlali Israel huan tlali Judá, mocahuaj ipan cuatitlamitl ipan pilxajcaltzitzí. ¿Quejatza huelis niyas nochaj nitlacuati, huan nitlaiti huan nicochis ihuaya nosihua? ¡Axtle! Ax quema nijchihuas ya nopa.

12 Huajca quiilhui David:

—Cualtitoc. Ximocahua ama nica huan mostla nimitzcahuilis timocuepas ipan tlathuijcaoytl.

Huajca Urías mocajqui nozona. 13 Huan David quinotzqui ma tlacua huan ma tlai ihuaya, huan David quiihuinti. Huan quema tlayohuixqui, Urías quisqui huan cochito sampa campa itlatequipanojcahua David, huan ax yajqui ichaj.

14 Huan hualmostla David quitlajcuilhui Joab huan quititlaní nopa tlajcuiloli ica Urías. 15 Huan ipan nopa tlajcuiloli quiilhuiyaya ya ni: “Xijtlalica Urías ipan nopa achtohui pamitl tlen soldados iixmelac campa más mahuilili nopa tlathuijcaoytl. Huan teipa ximoquixtica huan xijcajtehuaca iselti para ma quicococa huan ma quimictica.”

16 Huajca queja nopa quichijqui Joab. Quema quiyahualojque nopa altepetl para quitehuise, Joab quitlali Urías campa quimatiyaya itztocaj nopa soldados tlen más temachme tlen inincualancaitacahua.

17 Huan teipa quisque inincualancaitacahua ipan nopa altepetl huan quinmictijque miyac isoldados David, huan nojquiya mijqui Urías, nopa heteo tlatcatl. 18 Huan Joab quititlanqui se tlatcatl ma quiilhuiti David nochi tlen panotoya ipan nopa tlathuijcaoytl. 19 Huan Joab quiilhui itlatitlanil: “Huan quema titlamis tijpohuilía David nochi tlen panotoc, 20 intla yajaya cualanis huan mitzilhuis: ‘¿Para tlen inmonechcahuijque ipan itepa nopa altepetl? ¿Ax inquimatiyayaj para huelis tlejcos tepanixco huan quimajcahuasquíaq tlen hueli tepostli?’ 21 O intla quiijtos: ‘¿Ax inquilnamiquij tlen panoc ipan altepetl Tebes quema se situatl quimicti Abimelec, icone Jerobaal, ica se metlatl tlen quimajcahuili tlen huejcapa? Huajca ¿para tlen inmonechcahuijque tlahuel?’ Huajca intla queja nopa mitzilhuis David, xiquilhui: ‘Nojquiya mijqui motlatequipanojca, Urías, nopa heteo tlatcatl.’”

22 Huan nopa tlatitlanil quisqui iixpa Joab huan yajqui quiitato David. Huan quema ajsito, nochi quipohuili David queja Joab quiilhuijtoya. 23 Quiilhui:

—Tocualancaitacahua hualajque para techtehuasquíaq cuatitla, pero tiquintoquilijque hasta campa calaquitoj ipan inialtepe. 24 Huan nozona ininsoldados tlen moquetztocaj tepanixco pejqque techmaquilíaj ica inincuatlamin. Huan huajca mijque se quesqui tlen mosoldados, huan nojquiya mijqui Urías nopa heteo tlatcatl.

25 Huajca David quiilhui nopa tlatcatl:

—Quej ni xiquilhui Joab: Amo ximocueso ica tlen panotoc. Quemantzi miqij soldados ipan tlathuijcaoytl queja nopa. San ximoyolihui quejatza huelis tiquintetzopas teipa ica noja más soldados hasta tiquintzontlamiltis nochi tocualancaitacahua. Quej nopa xijyolchicahua Joab.

26 Huan quema nopa situatl tlen eliyaya isihua Urías quicajqui para mictoya ihuehue, mocueso huan tlahuel quichoquili. 27 Huan quema tlanqui nopa tonali para quichoquilis, David tlatitlanqui ma quihualiquilica ichaj huan quichijqui isihua. Huan teipa quitlacatilti se oquichpil. Pero TOTECO quiitac para fiero ni tlamantli tlen David quichijqui.

**Natán quiilhui David
para tlajtlacolchijtoc**

12 Huan TOTECO quititlanqui itiocamanalojca Natán, ma quiitati David. Huan quema Natán ajsito iixpa David, quipohuili se tlajtoli huan quiilhui:

—Ipan se altepetl itztoyaj ome tlacame; se rico huan se tlen teicneltzi. ²Huan nopa rico quinpiyayaya miyac huacaxme huan borregojme. ³Pero nopa teicneltzi ax tleno más quiipiyayaya, san se pilsihua borregojtzi tlen quicojtoya huan quimocuitlahuijtoya. Huan nopa pilborregojtzi moscaltijtoya ihuaya iteco iconehua. Huan iteco quitlamacayaya ica tlen ya itlacualis huan quiamacayaya tlen itaza. Huan hasta cochiyaya imaco huan nopa tlatatl quiicneliyaya nopa pilsihua borregojtzi queja elisquía se icone. ⁴Huan se tonal se tlatatl paxaloto ipan ichaj nopa rico huan yajaya ax quinejqui quimictis se huacax, o se borrego tlen iaxca para quitlamacas nopa paxalojquetl, huajca nopa rico yajqui quicuilito nopa teicneltzi ipilborrego. Huan quimicti huan quicuaitlali nopa paxalojquetl.

⁵Huajca David quema quicajqui nopa huicalotl, tlahuel cualanqui ica nopa tlatatl tlen rico huan quiilhui Natán:

—Nelía quinamiqui ma miqui nopa rico. ⁶Huan quinamiqui para quicuepilis nopa tlatatl teicneltzi nahui borregojme queja ipatla nopa se tlen quicuilito. Pampa quichijqui tlen fiero huan ax tetlasojtlac.

⁷Huajca Natán quiilhui:

—¡Ta tiitztoc nopa tlatatl rico! TOTECO Dios tisraelitame mitzilhuía ya ni: ‘Najaya tlen nimitztequitlali jtoc titlanahuatijquetl tlen Israel. Na tlen nimitzmanahuijtoc tlen Saúl. ⁸Na nimitzmacac icaltlanahuatil moteco Saúl, huan isihuajhua. Nimitzmacac tlanahuatili ica nochi israelitame campa hueli ipan tlali Israel huan tlali Judá. Huan intla tiquitasquía nochi ya nopa para pilquentzi, nimitzmacatosquía tlahuel miyac más. ⁹Huajca ¿para tlen tijtlahuelcajtoc notlanahuatil huan tenechixpanotoc ica ni tlamantli tlen tlahuel fiero? Tijmicti Urías, nopa heteo tlatatl, huan tij-

cuiili isihua. Tiquintequihui amonita tlacame para ma quimictica. ¹⁰Huajca ama nochipa oncas tlatehuijcajotl ipan mochaj ehuan pampa tenechtlahuelcajtoc huan tijchijtoc mosihua tlen eliyaya isihua Urías. ¹¹Na nijchihuas para motelpocahua huan tlacame tlen itztoque mocalijtic motlalanase para mitztehuise. Huan na nimitzcuilis mosihuajhua moixpa huan niquinmactilis sequinoc huan injuanti cochise ininhuaya tlamiyacapa. ¹²Ta tijchijqui nochi ni tlamantli ixtacatzí, pero na nijchihuas tlamiyacapa para nochi israelitame quimatise.’

¹³Huajca David quiilhui Natán:

—Quena, nelía nitlajtlacolchijtoc iixpa TOTECO.

Huan Natán quiilhui:

—TOTECO mitztlapojpolhuijtoc motlajtlacol huan ax timiquis por ya ni. ¹⁴Pero pampa tlahuel tiquixpanotoc TOTECO ica ni tlamantli, tiquinmacatoc lugar icualancaitacahua TOTECO para quihuetzquilise huan quimahuisspolose itoca. Huajca nopa mocone tlen ontlatatqui miquis.

¹⁵Huan Natán mocuepqui ichaj. Huan TOTECO quimacac se hueyi cocolistli nopa conetl tlen isihuacahual Urías quitlacatilti ica David. ¹⁶Huan David pejqui momajtohua huan quitlajtlani Toteco ma quichicahuas nopa conetl. Huan mosajqui huan mixtlapacho tlalchi seyohual. ¹⁷Huan nopa huehue tlacame tlen más quiipiyayaj tequihuejcajotl ipan icaltlanahuatil yajque quiitaj huan quiilhuijque ma mehua huan ma tlaqua ininhuaya, pero David ax quinejqui.

¹⁸Huan quema panotoya chicome tonali, nopa conetl mijqui, huan nopa tlacame majmahuiyayaj quiilhuisse David. Moilhuiyayaj: “Quema noja yoltaya nopa conetl huan tijyoltaliyayaj, ya ax quinejqui techtlacaquilis, huajca ama intla tiquilhuisse para ya mijqui, hueli más fiero mochihuilis.”

¹⁹Huan quema David quiitac para mocamahuiyayaj ixtacatzí nopa tlacame, quimachili para ya mictoya nopa conetl. Huajca quintlajtlani intla ya mictoya nopa conetl, huan quiilhuijque para, quena.

20 Huajca David mejqui campa huilantoya, huan malti, huan mopatlac huan mocualtlali. Teipa yajqui calaquito ipan itiopa TOTECO huan quihueyitlali. Teipa mocuepqui ichaj huan tlacujqui. 21 Huan itlatequipanojcahua quisentlachilijque huan quiilhuijque:

—¿Para tlen queja nopa titlachihua? Quema mocone noja yoltoya, ax titlacuayaya huan tlahuel tichocayaya. Huan que-ma mijqui, timejqui huan titlacujqui.

22 Huan David quinnanquili:

—Quema noja yoltoya nopa conetl nichocayaya huan nimosahuayaya pampa nimoilhuiyaya huelis Toteco Dios quipiyas hueyi iyolo ica na huan quichicahuas nocone. 23 Pero ama ya mijqui. ¿Para tlen nimosahuas huan nichocas? ¿Huelis na sampa nijyolitis? ¡Axtle! Na niyas teipa campa yajaya itztoc, pero yajaya ayoc mocuepas campa niitztoc na.

Tlacatqui Salomón

24 Huan David quiyoltlali isihua, Betsabé, huan cochqui ihuaya. Huan quipixqui seyoc icone tlen quitocajtlali Salomón. Huan TOTECO quicneli ni conetl. 25 Huan TOTECO quititlanqui Natán ma quiitati David. Huan pampa TOTECO quicneli, Natán quiilhui ma quitocajti nopa conetl Jedidías. (Jedidías quinequi quijtos Yajaya Tlen TOTECO Quiicnelía.)

David moaxcati altepetl Rabá

(1 Cr. 20:1-3)

26 Huan Joab ica isoldados yajque huan quintehuijque nopa amonitame ipan altepetl Rabá. Huan quitlanque nopa pilaltepzi campa huala nopa atl tlen quitequihuiyaya hueyi altepetl Rabá. 27 Huajca Joab quintitlanqui tlacame para ma quiilhuitij David: “Ya nijyahualojtoc altepetl Rabá huan niquincuilijtoc nopa altepetl tlen quimaca atl altepetl Rabá. 28 Huajca ama xiquinsentili nochi nopa israelita soldados tlen mocajtoque huan xihualaca, ximoaxcatiquij ni altepetl para ta tielis nopa tlanquetl, huan ax quihuicas notoca na queja elisquía na nijtlanqui.”

29 Huajca David quichijqui queja Joab

quiilhuijtoya. Quinsentili nochi isoldados, huan yajqui altepetl Rabá huan quitehuijqui. Huan moaxcati nopa altepetl. 30 Huan quicuilijque icorona nopa tlanahuatijquetl huan quitlalijque ipan itzonteco David. Huan nopa corona hueyi ipati eliyaya pampa nochi elqui tlen oro huan quipiayaya piltetzitzi yejyectzitzitzi tlen pajpatiyoy. Huan nopa corona quipixqui 33 kilos ietica. Huan nojquiya ipan nopa altepetl mocuili David miyac tlamantli tlen patiyoy. 31 Huan David quinquixti nopa amonitame tlen mocajtoyaj yoltoque ipan nopa altepetl huan quintlali ma tequitica ica sierras, picos huan hachas. Huan nojquiya quinchijqui ma quichihuaca tabiques ipan hornos. Nojquiya quinchijqui itlatequipanojcahua nopa amonitame ipan sequinoc altepetini. Huan teipa David mocuepqui ipan altepetl Jerusalén inihuaya nochi isoldados.

Amnón quiihpocapolo Tamar

13 Huan David quipixqui se itelpoca itoca Absalón huan yajaya quipiayaya se isihua icni tlen tlahuel yejyectzi eliyaya tlen itoca Tamar. Huan ica seyoc isihua David quipixqui seyoc itelpoca tlen itoca eliyaya Amnón. Huan Amnón nelía quiixtocac Tamar yonque eliyaya itepoztzi. 2 Huan Amnón nelpano quiixtocayaya Tamar hasta mococoliscuic. Huan Tamar eliyaya se ichpocatl huan ipan nopa tonali tlahuel momatiyayaj quinmocuitlahuíaj ichpocame para ax aqui quinajsis. Huajca yeca Amnón moilhuiyaya para elis ohui para quicajcayahuas. 3 Huan Amnón quipiayaya se ihuampo tlen itoca eliyaya Jonadab tlen eliyaya nojquiya imachicni pampa yajaya eliyaya icone Simea, tlen eliyaya David icni. Huan Jonadab tlahuel quimatiyaya quejatza tlacajcayahuas. 4 Huan se tonal quitlajtlani Amnón:

—Amnón, ta tiitelpoca nopa tlanahuatijquetl, ¿para tlen más timocuesohua mojmostla? ¿Tlaque tijpiya? ¿Xinechilhui! Huan Amnón quinanquili:

—Na niquixtoca Tamar, icni Absalón.

5 Huajca Jonadab quilhui:

—Na nimitzilhuis quejatza tijchihuas.

Ximotecati ipan motlapech huan ximococoxcanequi. Huan quema yas motata David mitzpaxaloti, xiquilhui quej ni: 'Nimitztlajtlanía xijtitlani noicni Tamar ma nechcualltaliliqui se tlacualistli para nij-cuas.'

⁶Huajca queja nopa quichijqui Amnón. Huan quema itata yajqui quipaxaloto quihui:

—Nimitztlajtlanía para xijtitlani noicni Tamar para ma nechcualltaliliqui noixpa se ome pantzi, huan ma nechtlamaca.

⁷Huajca David quititlanqui Tamar ichaj Amnón, huan quihui:

—Xiya ichaj moicni Amnón huan xijcualltaliliti itlacualis para ma tluca.

⁸Huan Tamar yajqui ichaj Amnón huan yajaya mococoxcanectoya ipan itlapech. Huan Tamar nimantzi pejqqui quixacualohua harina, huan quichijqui pantzi huan quicxiti. ⁹Huan quema ya eltoya, quitequili itlacualis huan quihualiquili Amnón, pero ya ax quinejqqui tluacas. Huan quinnahuati nochi itlatequipanojcahua ma panquisaca, huan nochi quisque. ¹⁰Huan Amnón quihui Tamar:

—Ama, xinechhualiquili notlacualis nica ipan nocuarto huan xinechtlamaca.

Huan Tamar quihuiquili. ¹¹Huan quema Tamar monechcahui campa Amnón itztoya, Amnón quinajnhuajqui huan quihui:

—Xicochiqui nohuaya.

¹²Huan Tamar quinanquili:

—Axtle, noicni, amo xinechfuerzajhui pampa tijmati se tlajtlacoli tlen nelía fiero ipan total Israel. ¡Amo xinechixpano! ¹³Ax quema tlamis nopinahualis. ¿Canque niyas para nimotlatis? Huan ica ta, tepa mitzixmatise queja se tlen más tifiero ipan Israel. Más cuali san xijcamahui nopa tlanahuatijquetl para ma techcahuili timonamictise huan temachtli techcahuilis.

¹⁴Huan Amnón ax quinejqqui quitlacaquilis. Huan pampa eliyaya más tetic, quifuerzajhui huan quichpocapolo. ¹⁵Huan nimantzi Amnón tlhuel quicualancaitac ica se hueyi cualantli. Quicualancaitac tepa hasta onpano queja quicneliyaya achtohui, huan quihui:

—Ximoquetza huan xiya.

¹⁶Huan Tamar ax quinejqqui quisas huan quihui:

—Noja más hueyi elis motlajtlacol para tinechpanquixtía que quema tinechixpanoc.

Pero Amnón ax quitlacaquili, ¹⁷huan quinotzqui se itlatequipanojca huan quihui:

—Xijpanquixti ni sihuatl huan xijtzacua cuali nopa puerta.

¹⁸Huan itlatequipanojca quipanquixti Tamar. Huan yajaya moyoyontijtoya cuali ica iyoyo huehueyac huan yejectzi queja nochi iichpocahua nopa tlanahuatijquetl moquentiyayaj. ¹⁹Huajca quitzayanqui iyoyo huan motlalili cuanextli ipan itzon-teco huan mocuaitzquitiyajqui huan chocatiyajqui.

²⁰Huan Absalón, iicni, quihui:

—¿Mitzixpanotoc Amnón? ¿Ax que? Ximoyoltlali, noicni. Amo tlhuel ximocueso, pampa yajaya moicni.

Huan Tamar mocajqui ichaj iicni Absalón. ²¹Huan quema Tlanahuatijquetl David quicajqui tlen quichijtoya Amnón, tlhuel cualanqui. ²²Huan Absalón tlhuel quicualancaitac Amnón ipampa nopa tlajtlacoli tlen quichihuili iicni, Tamar, pero ax tleno quihuiyaya.

Absalón quimicti Amnón tlen eliyaya iicni

²³Teipa quema ya panotoya ome xihuitl, itlatequipanojcahua Absalón yajtoyaj Baal Hazor ipan tlali Efraín para quiniximase iborregojhua. Huan Absalón quinotzqui nochi iicnihua ma yaca para ilhuchihuati. ²⁴Huan Absalón nojquiya yajqui quiiato itata, Tlanahuatijquetl David, huan quihui:

—Notlatequipanojcahua yajtoque quiniximatij noborregojhua huan nijnequi para ta xiitzto nohuaya huan nochi motlapalehuicahua.

²⁵Huan David quinanquili:

—Axtle, nocone, ax huelis tiyase tinochime, pampa tlhuel ohui elis para ta.

Huan yonque Absalón nelchicahuac quitlajtlani ma yas, David ax quinejqqui pe-

ro quitiochijqui miyac. ²⁶Huan Absalón quiilhui:

—Intla ta ax hueli tiyas, nimitztlajtlanía xijtitlani noicni Amnón.

Huan David quiilhui Absalón:

—¿Para tlen tijnequi ma yohui moicni Amnón?

²⁷Pero pampa Absalón quisenhuiquili quitlajtlanía, David quicajqui ma yohui Amnón huan nochi itelpocahua. ²⁸Huan Absalón quinilhuijtaya itlatequipanojcahua: “Quema inquitase para Amnón ya cuali tlaitoc huan nimechilhuis para xijmictica, huajca amo ximomajmatica. San ximosemacaca huan ximotemacaca xijchi-huaca notlajtol”.

²⁹Huan itlatequipanojcahua Absalón quimictijque Amnón queja quinilhuijtaya. Huan teipa nochi itelpocahua Tlanahuatijquetl David moquetzque huan tlejcoque ipan ininmula huan choloque.

³⁰Huan quema injuanti noja hualayayaj ipan ojtli, ajsico campa David se tla-catl tlen quihualiquiliyaya se tlajtoli, huan quiijto: “Absalón quinmicti nochi motelpocahua huan niyon se ax mocajqui yoltoc.”

³¹Huajca David tlhuel mocueso huan quitzayanqui iyoyo huan motejqui tlalchi huan nochi itlatequipanojcahua nojquiya quichijque. ³²Huan teipa tlananquili Jonadab, icone Simea tlen elqui iicni David, huan quiilhui:

—Tlanahuatijquetl David, amo ximoilhui para nochi moconehua quinmictijque. ¡Axtle! San Amnón quimictijque, pampa Absalón motemacatoya quimictis ipan nopa tonali quema quiixpanoc iicni, Tamar. ³³Huajca ama, amo xijneltoca ne tlajtoli para nochi motelpocahua mictoque, pampa san Amnón mijqui.

³⁴Huan Absalón cholo. Huan nopa telpocatl tlen tlachixtoya tepanixco quiitac para monechahuiyayaj miyac tlacame tlen hualayayaj ipan ojtli. ³⁵Huajca Jonadab quiilhui Tlanahuatijquetl David:

—Xiquita, ya hualahuij motelpocahua queja nimitzilhuijtoc.

³⁶Ipan nopa tlalochtli ajsicoj itelpocahua David, huan nochi pejque chocaj.

Huan David huan nochi itlatequipanojcahua nojquiya chocaque chichahuac.

³⁷Huan Absalón cholo huan yajqui ipan altepetl Gesur campa itztoya Tlanahuatijquetl Talmai, icone Amiud. ³⁸Huan nozona mocajqui eyi xihuitl. ³⁹Huan David mojmotla mochoquiliyaya pampa quitemohuayaya Absalón, huan ya moyoltalijtoya para mijqui Amnón.

Absalón mocuepqui Jerusalén

14 Huan quema Joab, icone Sarvia, momacac cuenta para Tlanahuatijquetl David tlhuel quinequiyaya quiitas icone, Absalón, ²huajca tlanahuati ma quicuitij se sihuatl tlen pilaltepetzi Tecoa pampa tlhuel tlanamiquiyaya. Huan Joab quiilhui quejatza ma quiilhuiti nopa tlanahuatijquetl, quiijto: “Ximoyoyonti huan ximochihua queja tijpiya miyac cuesoli. Amo ximoyejyecchihua para queja nopa tinesis para ya huejcajtoc tijpiya cuesoli pampa acajya mijqui. ³Huan xiya iixpa nopa tlanahuatijquetl huan tiquilhuis queja nimitzilhuis.”

Huan Joab quiilhui nochi tlen quinequiyaya ma quiilhuisquía David. ⁴Huan nopa sihuatl tlen Tecoa yajqui quiitato Tlanahuatijquetl David. Huan quema ajsito, mohuijzonqui hasta tlalchi ica miyac tlatlepanitacayotl huan quiilhui:

—Xinechpalehui, Tlanahuatijquetl.

⁵Huan David quiilhui:

—¿Tlaque tijpiya?

Huan ya quinanquili:

—Na nicahuali pampa nohuehue ya mijqui. ⁶Huan niquinpiyayaya ome noconehua. Huan se tonal motehuijque campa tequitiyayaj huan ax aqui quinmanahui. Huan se tlen injuanti quimicti iicni. ⁷Huan ama nochi nochaj ehuan nechcualancaitaj huan quinequij ma niquinmactili nocone tlen quimicti iicni para nojquiya quimictise queja ya quimicti iicni. Pero intla niquinmactilis, ayoc nijpiyas niyon se aqui ipan tlattepectli huan ixpolihuis itoca nohuehue.

⁸Huajca Tlanahuatijquetl David quiilhui nopa sihuatl:

—Xiya mochaj huan na nitlanahuatis para ax aqui huelis quicocos.

⁹Huan nopa sihuatl quiilhui Tlanahua-tijquetl David:

—Ma huetzi nopa tlajtlacoli ipan na huan ipan notata. Huan ta titlanahuatij-quetl ax tijhuicas tlajtlacoli ipan ni tlamantli, niyon motlanahuatl.

¹⁰Huan David quiilhui:

—Intla se acajya mitzcuatotonis ipam-pa motelpoca, xinechhualiquili huan ayoc quema mitzcuatotonis.

¹¹Huan nopa sihuatl sampa quiilhui:

—Nimitztlajtlanía iixpa TOTECO Dios tlen tijtequipanohua para ma ax aqui quimictis nocone. Na ayoc nijnequi ma onca miquistli.

Huan David quiilhui:

—Nelía nimitztlahuía niyon se tlamantli ax quichihuilise mocone.

¹²Huan nopa sihuatl sampa quiilhui:

—Xinechcahuili nimitztlajtlanis seyoc tlamantli.

Huan David quiijto:

—Xinechilhui

¹³Huajca nopa sihuatl quiilhui:

—¿Para tlen ax tiquinchihuilis sequi-noc israelitame tlen tiquijtojtoc tinechchi-huilis na huan nocone? Pampa ica tlen ti-quiijtojtoc timotlajtlacolmacac ica moselti. Ta nojquiya ax tijcahuilijtojtoc ma mocuepa mocone, Absalón, tlen mohuejcatlalijtojtoc. ¹⁴Nochi tojuanti timiquise se tonal. Toyolis ax huejcahua. San eltoc queja atl tlen toyahui tlalchi huan ax aqui hueli quisentilía. Huan Toteco Dios ax quimictía se tlen mohuejcatlalijtojtoc, yajaya quitemo-hua quejatza quicuepaltis sampa. ¹⁵Pero na nihualajqui moixpa pampa nochi nopa tlacame nechmajmatijque huan quinequij nechmictilise nocone. Huan nimoilhui para nimitzitaqui para tinechmanahuisquía.

¹⁶Pampa noselti nimoilhui: Quema nopa tlanahuatijquetl quicaquis tlen niitlate-quipanojca niquilhuía, nechmanahuis tlen ne tlacame tlen quinequij nechzontlamil-tise na huan nocone, huan nechixpolose ipan ni tlali Israel tlen Toteco Dios nech-macatoc. ¹⁷Huan nojquiya nimoilhui: Quena, nopa tlanahuatijquetl nechyoltla-lis ica tlen nechilhuis, pampa yajaya itztoc queja se ielhuicac ejaehua Toteco Dios

tlen quimachilía tlen cuali huan tlen fiero. TOTECO Dios tlen moTeco ma itzto mo-huaya.

Queja nopa quiijto nopa sihuatl.

¹⁸Huan David quiilhui nopa sihuatl:

—Nijnequi nimitztlajtlanis se tlamantli. Ax tleno xinechtlatili, san xinechilhui tlen melahuac.

Huan nopa sihuatl quinanquili:

—Cualtitoc, notlanahuatijca, xinechilhui tlaque tijnequi tijmatis.

¹⁹Huan David quiilhui:

—Xinechilhui intla Joab mitztitlantoc. Huan nopa sihuatl quinanquili:

—Quena, Joab nechtitlanqui huan yajaya nechilhui nochi quejatza ma nimitzcamahuis. ²⁰Huan quichijqui nochi para timomacas cuenta tlen ni tlamantli huan quejatza elisquía intla tijtlatolsen-cahuasquía seyoc tlatatl icone. Pero ta tlahuel titlalnamiqui queja se tielhuicac eja Toteco huan tijmati nochi tlen pano.

²¹Huajca David quinotzqui Joab huan quiilhui:

—Cualtitoc, xiya huan xiquilhuiti Absalón na huala.

²²Huan Joab mohuijzonqui hasta tlalchi, huan quitiochijqui Tlanahuatijquetl David huan quiilhui:

—Ama nijmachilijtojtoc para tinechtlasojtla pampa tijchijtojtoc queja nimitztlajtlaniyaya.

²³Huajca Joab motlalanqui huan yajqui altepetl Gesur campa itztoya Absalón huan sampa quihualicac ipan Jerusalén. ²⁴Huan David quichijqui ni tlanahuatili: “Quema ajsis, xiquilhuica Absalón para ma ajsiti ichaj, pero ax ma moixnextis campa nohaj, pampa ax nijnequi niquitas.”

²⁵Huan Absalón eliyaya nelía yejyectzi huan ipan nochi tlali Israel ax mopantiyaya seyoc queja ya. Nochi itlacayo tlen iic-xihua hasta itzoncal ipan itzonteco, ax tleno tlen ax cuali quipixqui; senquistoc cuali nochi itlacayo. Huan nochi israelitame quihueyichihuayaj. ²⁶Huan itlamiya sen-xihuitl motequiliyaya itzoncal pampa etic, huan itetica eliyaya ome kilo huan tlajco. ²⁷Huan Absalón quinpiyayaya eyi

ioquichpilhua huan se isihuapil tlen quito-cajtlalijtoya Tamar, huan Tamar nojquiya mochijqui se sihuatl tlahuel yejyectzi.

²⁸ Huan mocajqui Absalón ome xihuitl huan tlajco ipan altepetl Jerusalén huan ax quiiatc ixayac itata, Tlanahuatijquetl David. ²⁹ Huajca Absalón tlatitlanqui ma quinoztatij Joab para ma yohui quiiatati Tlanahuatijquetl David huan ma quicamahui ipampa ya. Pero Joab ax quinejqui yas. Huan ica ompa quinoztzqui huan sampa ax quinejqui. ³⁰ Huajca teipa Absalón quinnahuati itlatequipanojcahua ma quitlatitij imil Joab campa quitoctoaya cebada pampa imil Joab mocahuayaya iteno imil Absalón. Huan itlatequipanojcahua yajque quitlatitoy. ³¹ Huajca Joab yajqui quitato Absalón huan quiilhui:

—¿Para tlen motlatequipanojcahua yajque nechtlalitoy nomil campa nijtoctoaya cebada?

³² Huan Absalón quinanquili:

—Pampa na nitlatitlantoc para ma mitznottatij huan para tihualasquía nica. Nimitztitlanisquía xiquitati Tlanahuatijquetl David. Nijnequi xijtlajtlani para tlen nechquixit ipan altepetl Gesur intla ax quinequiyaya nechitas. Más cuali nimocajtosquía nepa. Na nijnequi ma nechcahuili niquitas huan intla quipantía para nijhuica tlajtlacoli, ma nechmicti.

³³ Huan Joab yajqui quipohuilto David nochi queja quiilhujtoya Absalón. Huan David tlanahuati ma quinoztatij Absalón. Huan quema Absalón ajsico iixpa David mohuijtzonqui hasta tlalchi queja momatque quichihuaj, huan David quitzoponi.

Absalón quinsentili soldados tlen majtlactli familias

15 Huan quema ya panotoya tonali, Absalón mocohui se tepos carro queja se tlanahuatijquetl, huan mocohui cahuyojme para quitlanase huan 50 tlacame para motlalose iixpa para teyolmelahuase para huala. ² Huan Absalón pejqui mehua ijnaltzi mojmotla huan pejqui moquetza campa cuapuerta ipan itepa nopa altepetl. Huan quema hualayaya se acajya

para quitasquía tlanahuatijquetl David pampa quiipiyayaya se cualantli, Absalón quinoztayaya ica yejyectzi huan quiilhuiyaya: ¿Tlen tlaque altepetl tihuala? Huan yajaya tlen ajsiyaya quiilhuiyaya para eli se israelita. ³ Huan teipa Absalón quiilhuiyaya: “Nelia cuali tlen tiquijtohua huan, quena, quinamiqui para se mitztlajtolsencahuas. Pero Tlanahuatijquetl David ax quitlalijtoc niyon se aqui para mitzpalahuis ipan ni tlamantli.” ⁴ Tlahuel nechpactisquía intla nechtequitlalisquía na para nimechtlajtolsencahuas. Queja nopa nochi tlen quiipiyasquía se cualantli hualasquía nechitaquij huan na niquintlajtolsencahuasquía xitlahuac. ⁵ Huan intla se acajya hualayaya huan mohuijtzomayaya iixpa Absalón, ya ax quicahuiliyaya. Nimanntzi quimaitzquiyaya huan quitzoponiyaya. ⁶ Huan queja nopa quichihuayaya ica nochi israelitame tlen hualayayaj campapa nopa tlanahuatijquetl para ma quinsencahuili se tlenijqui. Huajca yeca Absalón quichijqui para nochi israelitame tlen hualayayaj ipan tlali Israel ma quicnelica.

⁷ Huan quema quixaxiti nahui xihuitl para ajsitoyaya ipan Jerusalén, Absalón quiilhui David:

—Nimitztlajtlanía xinechcahua niyas altepetl Hebrón nijmacati tlacajcahualistli Toteco, pampa queja nopa nimocajtoc ica TOTECO. ⁸ Pampa quema niitztoya ipan altepetl Gesur niquilhui TOTECO intla nechcahuilisquía nimocuepas nica ipan altepetl Jerusalén, huajca nijtequipanos huan nijmacas tlacajcahualistli.

⁹ Huan Tlanahuatijquetl David quiilhui:

—Cualtitoc, xiya huan xijchihua queja tiquijtojtoc.

Huan Absalón yajqui altepetl Hebrón. ¹⁰ Huan quema Absalón onajsitoyaya Hebrón quintitlanqui tlacame ipan nochi altepetini campa itztoyaj israelitame huan quiniilhuijque para ma quitlacaquilise se tlapitzali. Huan quema quicaquise molinis tlapitzali, quimatise para Absalón quitequitlalijtoque ipan altepetl Hebrón para elis tlanahuatijquetl ipan tlali Israel huan

monequi teyolmelahuase. ¹¹Huan nojquiya Absalón quinnotztoya 200 tlacame ipan Jerusalén ma yaca tlacuatij ihuaya. Huan injuanti ax tleno quimatiyayaj tlaque teipa quichihuasquía Absalón. ¹²Huan quema Absalón quilatiyaya tla-cajcahualistli, nojquiya tlatitlanqui ma quinnotzatij Ahitofel tlen ialtepe Gilo. Yaja eliyaya se tlen quiconsejomacayaya David. Huan Ahitofel ajsico huan moiycatlali ica Absalón. Huan nopa tlacame tlen quitoquiliyayaj Absalón momiyaquiliyayaj pampa tlahuel miyac israelitame calaquiyayaj ihuaya hasta quipixque miyac chicahualistli.

David cholo tlen Jerusalén

¹³Huan ajsico se tlatatl tlen quuilhuico David para nochi israelitame ipan tlali Israel quitoquilíaj Absalón queja inintlanahuatijca. ¹⁴Huajca David quinilhui nochi itlapalehuijcahua tlen itztoyaj ihuaya:

—Ma tiisihuica ticholose para timomanahuse, pampa intla axtle, niyon se tlen tojuanti huelis cholos. Xiisihuica para ax techajsis, pampa intla techajsis nica, techtlamimictise tlen tiitztoque ipan ni altepetl.

¹⁵Huan nochi itlapalehuijcahua quinancuilijque:

—Tiitztoque mohuaya huan tijchihua-se tlen ta tiquta para cuali.

¹⁶Huan nimantzi quisqui Tlanahuatijquetl David ica nochi ichaj ehuani. San quincajqui majtactli isihuajhua para quimocuitlahuise nopa caltlanahuatili. ¹⁷Huan quema quistiyohuiyayaj Tlanahuatijquetl David ica nochi itlacajhua, moquetzque iteno nopa altepetl. ¹⁸Huan panoque nochi nopa soldados para quintlayacanaltise. Huan itztoyaj nojquiya nochi nopa soldados tlen quimocuitlahuiyayaj nopa tlanahuatijquetl huan tlen motlalohuayayaj para quihuicase tlajtoli huan tematiltise. Huan 600 tlacame tlen quistoyaj ipan altepetl Gat huan icxinejnentoyaj hasta Jerusalén nojquiya panoque. ¹⁹Huan David quinnotzqui Itai tlen quinyacanayaya nopa altepetl Gat ehuani huan quiihui:

—¿Para tlen tihualajtoc nica? Más cuali para timocuepas ipan Jerusalén, huan

ximocahua ihuaya nopa yancuic tlanahuatijquetl. Ta tiehua seyoc tlali huan huejca moaltepe. ²⁰San tionajsico huan ax quina-miqui para nimitzfuerzajhuis ticalaquis ica tojuanti. Niyon ax nijmati canque tijajsiiti. Más cuali para ximocuepa huan nojquiya nochi injuanti tlen hualajtoque mohuaya. Huan ma TOTECO mitztiochihua huan ma itzto mohuaya nochipa.

²¹Huan Itai quinancuili:

—Na nijtestigojquetza Toteco Dios, para campa hueli ta tiyas, na niyas mohuaya, yonque nimiquis mohuaya o noja niitstos.

²²Huajca Tlanahuatijquetl David quinancuili:

—Cualtitoc, xitlayacantiyaca huan inyase tohuaya.

Huan Itai huan nochi isoldados, huan ichaj ehuani, huan iconehua yajque ihuaya David. ²³Huan oncac se hueyi choquistli ipan nochi nopa tlali quema Tlanahuatijquetl David huan nochi tlen itztoyaj ihuaya quisque. Huan apanoque nopa atlatjli Cedrón para calaquise ipan nopa huactoc tlali. ²⁴Huan ininhuaya yahuiyayaj nojquiya nopa totajtztzi Abiatar huan Sadoc huan nochi nopa levitame. Huan injuanti quihuicayayaj icaxa Toteco Dios huan quilalijque ojtentli hasta quema nochi panoque. ²⁵Huan Tlanahuatijquetl David quiihui Sadoc:

—Xijhuica icaxa Toteco Dios sampa ipan altepetl Jerusalén huan intla TOTECO nechcahuilis, nimocuepas huan sampa niquitas icaxa Toteco huan iYoyon Tiopa. ²⁶Huan intla TOTECO nechilhuis para ayoc quipactia tlen nijchihua, huajca ma nechchihuil tlen yajaya quinequi.

²⁷Huan nojquiya Tlanahuatijquetl David quiihui nopa totajtzi Sadoc:

—¿Ax ta tise tlachixquetl? Nimitzilhuía sampa xiya ipan Jerusalén huan ximocahua ica tlasehuilistli ica mocone, Ahimaas, huan ica Jonatán, icone Abiatar. ²⁸Huan na nimitzchiyas nica huan aya nicalaquis ipan nopa huactoc tlali hasta quema innechyolmelahuase tlaque pano ipan nopa altepetl.

²⁹Huajca Sadoc huan Abiatar sampa quihuicaque icaxa Toteco Dios ipan Jeru-

salén, huan nozona moajque. ³⁰Huan David itxlejoc nopa tlaixtlejcolis ipan nopa tepetl Olivos. San chocatiyajqui huan motzontzactiyajqui, nion ax quihuicayaya itecac, pampa tlahuel mocuesohuayaya. Huan nochi tlen itztoyaj ihuaya nojquiya motzontzajque huan chocatinenque. ³¹Huan teipa se quihhui David para Ahitofel nojquiya motlalijtoya ihuaya Absalón. Huajca David momajto ica TOTECO huan quihhui: “Se favor, TOTECO, xijchihua para itlajtol Ahitofel ma nesi queja tlajtoli tlen ax tleno ipati para ax aqui quichihuas tlen quijtohua.”

³²Huan quema David ajsito iixco ne tepetl campa tlacame quihueyitlaliyayaj Toteco Dios, quinamijqui se huehuentzi itoca Husai tlen nopa familia Arquita. Quihualicayaya iyoyo tzayantoc huan tlali ipan itzonteco pampa tlahuel mocuesohuayaya ipampa tlen ipantic David. ³³Huan David quihhui:

—Achi cuali amo xicholo tohuaya, pampa monequi timitzchixtiyase. ³⁴Más cuali sampa xiya Jerusalén huan xiquihui notelpoca Absalón para tijtequipanos. Xiquihui para miyac xihuitl tinechmacayaya consejos huan tinechtequipanohuayaya huan ama tijpalehuis ya. Huan queja nopa quema Ahitofel quihhui ma quichihua se tlenijqui, ta tiquihui ma quichihua seyoc tlamantli para ax qitoquilis itlajtol Ahitofel. ³⁵Huan nojquiya itztoque ipan Jerusalén nopa to-tajtzitzi Abiatar huan Sadoc tlen mocahuaj tohuaya. Xiquihui nochi tlen tijcaqui tlen Absalón quisencahua para quichihuas. ³⁶Huan inijuanti quipiyaj ome ininconeua tlen itztoque nozona ininhuaya: Jonatán, icone Abiatar huan Ahimaas, icone Sadoc. Huajca hueli nechtitlanilise ininconeua para ma nechmatilica nochi tlen inquina-tij.

³⁷Huajca Husai ihuampo David yajqui ipan altepetl Jerusalén huan ajsito quema Absalón oncalaquiyaya ipan nopa altepetl.

Siba quihhui David

16 Quema David sanoc pejtaya ixtemo tlen nopa tepetl, quinamijqui Siba tlen eliyaya itlatequipanojca Mefi Boset.

Huan quihuicayaya ome burrojme tlen quintlamamaltijtoya ica 200 pantzi, 100 tla-tectli tlen xocomecat, 100 pantzi tlen higos huactoc huan se cuetlaxtli temitoc ica xocomeca atl. ²Huan David quitlajtlani Siba:

—¿Para tlen tijhualica nochi ya ni?

Huan Siba quinanquili:

—Ni burrojme niquinhualicatoc para ma ipan tlejoca mochaj ehuan, huan ni pantzi para ma quicuaca mosoldados, huan ni xocomeca atl nojquiya para ma quihui tlen siyahuij ipan huactoc tlali.

³Huan David quihhui Siba:

—¿Huan canque itztoc Mefi Boset, moteco?

Huan Siba quinanquili:

—Mocajqui Jerusalén, pampa quijto ama huels mochihuas tlanahuatijquetl. Huan queja nopa sampa moaxcatis itlanahuatilis ihueyi tata.

⁴Huan David quihhui Siba:

—Huajca na nimitzmactilía ama nochi tlen iaxca Mefi Boset.

Huan Siba mohuijtzonqui hasta tlalchi iixpa queja quihueyitlepanitayaya. Huan quitlascamatqui huan yajqui.

Se tlaacatl tlen altepetl

Bahurim quitelchijqui David

⁵Teipa Tlanahuatijquetl David huan nochi tlen itztoyaj ihuaya nejneneque hasta ajsitoj se altepetl itoca Bahurim. Huan nozona quisqui se tlaacatl tlen elqui se iteixmatca mijcatzi Saúl huan itoca eliyaya Simeí huan elqui icone Gera. Huan nopa tlaacatl Simeí quitelchihuayaya, ⁶huan quimajcahuiliyaya tetl Tlanahuatijquetl David huan nochi itlatequipanojcahua tlen ihuaya yahuiyayaj. Nojquiya quimajcahuiliyaya tetl nopa huejhueyi soldados tlen quimocuitlahuiyayaj David ipan sese lado. ⁷Huan ya quitelchihuayaya Tlanahuatijquetl David huan quihhuiyaya:

—¡Xiya, xiya tifiero tlaacatl! ¡Titemictij-quetl! ⁸TOTECO mitzcuepilijtoque pampa tiquinmicti ichaj ehuan Saúl, huan timocuil itlanahuatil huan nochi tlen eliyaya iaxca. Huajca yeca ama TOTECO quimacatoc motlanahuatil mocone, Absalón, pampa tifiero huan miyac tijtoyajqui estli.

⁹Teipa Abisai, icone Sarvia, quilhui Tlanahuatijquetl David:

—Xinechcahuili ma nijquechtzontequiti ne huihui tlacatl. ¿Para tlen yajaya tlen itztoya queja se chichi tlen mictoc mitztelchihuas quej ni? Ta titlanahuatijquetl.

¹⁰Huan David quinanquili:

—¡Axtle! Amo ximocalaquica ipan ni tlamantli, icononehua Sarvia. Huelis TOTECO quilhuijtoc ma nechtelchihua. Huan intla queja nopa, ¿ajqueya tojuanti para tiquilhuse ma ax quichihua?

¹¹Huan David quilhui Abisai huan nochi itlatequipanojcahua:

—Xiquitaca, Absalón nocone tlen quisqui ipan notlacayo quinequi nechmictis, pero ni tlacatl tlen iixhui Benjamín tlen ax quema itztoya tohuaya san nechtelchihua. Ax tleno xijchihuilica pampa huelis TOTECO quinquatijtoc ma quichihua. ¹²Huan teipa huelis TOTECO nechitas para ax notlajtacol nopa tlamantli tlen ica nechtelchihuayaya huan huajca, quena, Toteco nechtiuchihuas ipampa ni tlattelchihualistli tlen ama nijpanti.

¹³Huan David huan nochi itlatequipanojcahua panotiyajque ipan iniojhui, huan nopa tlacatl Simei quintoquilijtijajqui ipan se lado tlen se tepetl. Huan quinzelchijtijajqui, huan quinmajcahuilijtijajqui tetl huan tlaltejpocitli. ¹⁴Huan Tlanahuatijquetl David huan nochi itlacajhua ajsitoy campa yahuiyayaj tlahuel tlaxicojtoque huan mocajque nozona se quentzi para mosiyajcahuase.

Absalón quitlanqui altepetl Jerusalén

¹⁵Huan Absalón huan nochi nopa tla-came tlen itztoyaj ihuaya calajque ipan Jerusalén, huan Ahitofel itztoya ininhuaya. ¹⁶Huan Husai ihuampo David quina-miquito Absalón huan quihueyichijqui huan quilhui:

—Ma huejcahua tiitztos, titotlanahuatijca.

¹⁷Huan Absalón quilhui:

—¿Queja nopa tijtlascamati mohuam-po David? ¿Para tlen ax tiyajqui ihuaya?

¹⁸Huan Husai quilhui Absalón:

—¡Axtle! Ax nihueli pampa na nimoca-

huas mohuaya ta. Mitztlapejpenijtoc TOTECO, huan ni tlacame nica huan nochi israelitame campa hueli para telis titlanahuatijquetl. ¹⁹Huajca ¿para tlen ax nimitztequipanos? ¿Ax quinamiqui nimitz-palehuis ta tlen tiicone David? Quena, queja nijtequipano motata David, nojquiya nimitztequipanos ta.

²⁰Huan teipa Absalón yajqui quuitato Ahitofel tlen teconsejomaca huan quilhui:

—Xinechilhui tlaque nijchihuas.

²¹Huan Ahitofel quilhui:

—Xicochi ininhuaya isihuajhua motata David tlen quincajtoc para quimocuitlahuse nopa caltlanahuatili. Huan queja nopa nochi israelitame quimatise para tlahuel tijcualancamacatoc motata huan ayoc hueli inmoyoltlalise. Huan huajca nochi tlen mitztoquilíaj más mosemacase.

²²Huajca itlacajhua quichijque seyoc cuarto para Absalón itzonixco ichaj David. Nozona Absalón cochqui ininhuaya isihuajhua itata huan nochi israelitame quitaque. ²³Huan Absalón quichihuayaya nochi tlen Ahitofel quilhuiyaya queja itata, David, nojquiya quichijqui. Pampa nochi itlajtol Ahitofel elqui temachtli queja quistoya ipan icamac Toteco Dios.

Husai ax quicahuili Ahitofel ma quimicti David

17 Huan nojquiya Ahitofel quilhui Absalón:

—Xinechcahuili ma niquinhuicas 12 mil soldados huan tijtemose David ni yohuali. ²Nicajsis quema ya tlaxicojtos huan ax quipiyas fuerza para momanahuas. Huan nopa tla-came tlen itztoque ihuaya momajmatise huan cholose huan huajca nijmictis san David. ³Huan niquin-cuepas nochi itlacajhua ica ta, huan moyoltlalise huan oncas paquilistli. Pampa nochi israelitame mitztoquillise intla ayoc itztos David.

⁴Huan Absalón huan nochi nopa huehue tla-came quijtojque para cuali tlen Ahitofel quijtojtoya para quichihuas.

⁵Pero Absalón quijto:

—Ma tijnotzase nojquiya Husai tlen

ichaj ehuaní Arquita, huan tijcaquise tlaque consejo techmacas ica tlen quiiijtojtoya Ahitofel.

⁶Huan Husai ajsico huan Absalón quiiilhui:

—Ahitofel quiiijtojtoc para quej ni tijchihuase. ¿Quejatzá tinoilhuía ta? ¿Cuali tijchihuase o axtle?

⁷Huan Husai quinanquili:

—Nimoilhuía para ni huelta huelis ax cuali tlen Ahitofel quiiijtojtoc. ⁸Tijmati motata, huan nochi nopa soldados tlen itztoque ihuaya, tlahuel motemacaj. Niman-tzi tlahuel cualanise queja se tenan osa tlen itztoque cuatitla huan quicuiliijtoque iconehua. Motata quipanotoc miyac tlatehujicayotl huan tlahuel quimatí quejatzá tlatehuis. Yaja ax cochi campa itztoque nopa sequinoc itlacajhua. ⁹Niquita para ya motlatijtoc ipan se mijca ostotl o se lugar ixtacatzí, huan intla yasquíaj mosoldados ama quitomotij, yajaya quisas huan quintetzopas huan quinmictis. Huan niman-tzi nochi quicaquise nopa tlajtoli para quinmictijque ta motlacajhua. ¹⁰Huan moyolmajmatise motlacajhua, yonque ama tlahuel motemacaj huan quipiyaj ininyolo queja se tecuani. Intla moyolmajmatise, ayoc quinequise tlatehuisse pampa nochi israelitame quimatij para motata tlahuel quipiya fuerza huan isoldados nojquiya. ¹¹Na nimitzconsejomaca para achtohui xiquinsentili nochi israelita soldados tlen campa hueli. Xiquinsentili tlen itztoque ipan altepetini tlen tlali Dan ica huejcapa hasta tlen itztoque ipan altepetl Beerseba ica tlatzintla. Huan ica ya nopa, quena, tiqinpiyas tlahuel miyac mosoldados queja imiyaca xali iteno hueyi atl, huan ta tiqinyacanas ipan tlatehujicayotl. ¹²Huan queja nopa, quena, tijpantitij motata ipan tlen hueli lugar campa itzto, huan tiquintetzopatij queja quema ajhuechtli huetzi tlalchi ipan nochi tlen onca. Huan queja nopa nochi tiquinmictise. Huan ax aquí mocahuas yoltoc, niyon motata. ¹³Huan intla injuanti motlatitij ipan se altepetl, tiyase tinochime ica mecattl hasta tijxolehuase nopa tepamitl huan tijtilanase sesen tetl tlen eliyaya ipan nopa

tepamitl hasta campa tlamayamitl. Ax tijcahuase niyon se tetl tlen motlalijtos ipan seyoc.

¹⁴Huajca Absalón huan nochi nopa israelitame quiiijtojque para más cuali tlen Husai quiiijtojtoya huan ax tlen Ahitofel quiiijtojtoya. Pampa TOTECO quichijtoya para ax quipatiitasquíaj tlen Ahitofel quiiijtojtoya para ma huala tlen fiero ipan Absalón.

¹⁵Huan Husai quinilhuito nopa totaj-tzitzi Sadoc huan Abiatar nopa tlajtoli ica tlen Ahitofel quiconsejomacac ma quichihuaca Absalón huan nopa huehue tlacame tlen Israel. Nojquiya Husai quinilhui tlen ya iselti quinilhujtoya ma quichihuaca.

¹⁶Huan nojquiya quinilhui:

—Xijtitlanica se acajya niman-tzi para ma quiiilhuiti David ma ax mocahuaca nopona, pero ma apanoca atemitl Jordán. Pampa intla axtle, quimictise totlanahuatijca huan nochi tlacame tlen itztoque ihuaya.

¹⁷Huan Jonatán huan Ahimaas mocahuayayaj altepeteno campa itoca eliyaya En Rogel para ax aquí quinitasquía intla calaquiyayaj Jerusalén. Huan ya quisencajtoyaj para se sihua tequitiquetl ma quinmacati tlajtoli, huan injuanti quiyolmelahuasquíaj Tlanahuatijquetl David. ¹⁸Pero quema Jonatán huan Ahimaas quisque tlen En Rogel para quiiilhuitij David, se telpocatl quinitac huan yajqui quiiilhuito Absalón. Huajca nopa telpocame moisihuiltijque huan ajsitoyaj ichaj se tlatatl ipan altepetl Bahurim tlen quipiyayaya icalixpa se ameli tlen ax quipiyayaya atl. Huan nopona calajque huan motlatijque. ¹⁹Huan isihua nopa tlatatl quintetzajqui nopa ameli huan ipani quihuatzqui trigo. Huan axaca momacac cuenta intla itztoyaj amelijtic. ²⁰Huan quema ajsicoj isoldados Absalón huan quitlajtlanijque nopa sihuatl:

—¿Canque itztoque Ahimaas huan Jonatán?

Huan nopa sihuatl quiiijto:

—Ya apanoque nopa pilatlatjzti huan yajque.

Huajca nopa soldados yajque quinte-

motoj, pero ax quinajsique. Huan sampa mocuepque Jerusalén.

²¹ Huajca teipa Jonatán huan Ahimaas quisque huan yajque quilhuitoj David para ma quisaca huan ma apanoca atemítl Jordán pampa Ahitofel quinequiyaya para nopa yohuali yasquía quinmictiti. ²² Huajca nimantzi David huan nochi tlen itztoyaj ihuaya quisque huan apanoque atemítl Jordán. Huan quema tlanesqui nochi ya itztoyaj seyoc nali, huan ax aqui mocajtoya.

²³ Huan quema Ahitofel quiitac para Absalón ax quichijqui tlen ya quihuijtoya ma quichihua, tejcoc ipan iburro, huan yajqui ichaj ipan ialtepe. Teipa quicualltali nochi tlamantli huan moquechuapiloto huan mijqui. Huan quitlalpachojque campa itata quitlalpachojtoyaj.

David ipan Mahanaim

²⁴ Huan David ajsito altepetl Mahanaim. Huan Absalón huan nochi nopa israelita soldados tlen mosentilijtoyaj ihuaya apanoque atemítl Jordán para quitoquili-se. ²⁵ Huan Absalón quitlalijtoya Amasa ma quinyacana isoldados ipan ilugar Joab tlen quinyacanayaya isoldados David. (Inana Joab eliyaya Sarvia. Huan Sarvia quipixqui se isihua icni tlen itoca Nahas tlen quipixqui se iichpoca tlen itoca eliyaya Abigail. Huan se ismaelita tlatcatl itoca Itra quiconemacac Abigail huan queja nopa tlatcatqui Amasa. Huajca Amasa eliyaya imachicni Joab.)

²⁶ Huan Absalón huan nochi israelita soldados mochihuatoj ipan tlali Galaad. ²⁷ Quema David ajsito altepetl Mahanaim nimantzi quinamiquicoj Sobi, Maquir huan Barzilai tlen quihualiquiliyayaj miyac tlamantli. (Sobi elqui se amonita tlatcatl tlen eliyaya icone Nahas ipan altepetl Rabá. Huan Maquir eliyaya icone Amiel tlen altepetl Lodebar. Huan Barzilai ejqui altepetl Rogelim ipan tlali Galaad.) ²⁸ Huan injuanti quinhualiquiliyayaj tlapecthli, tazas, chachapali, trigo, cebada, harina, huan sintli cacatztic, etl, nopa seyoc etl tlen siltic, ²⁹ nectli, manteca, queso huan borregojme. Huan nochi quihuali-

quiliyque David huan itlacajhua ma quicuaca, pampa moilhuyiyaj; huelis mayanaj, huan tlaxicohuaj, huan amiquij, pampa panoque ipan nopa huactoc tlali campa ax tleno onca.

David mocualtlali para tlatehuicayotl

18 Huan David quincualtlali nochi isoldados tlen ihuaya itztoyaj huan quintlali tlayacanani ipan sesen mil soldados huan ipan sesen cien soldados. ² Huan teipa David quinxelo isoldados tlen itztoyaj ihuaya ica eyi pamítl. Huan Joab quitlali ma quinyacana se pamítl, huan seyoc pamítl quimacac Abisai tlen eliyaya icone Sarvia huan icni Joab para ma quinyacana, huan ne seyoc pamítl quimacac Itai, ne geteo tlatcatl. Huan Tlanahuatijquetl David quinilhui:

—Na nojquiya niyas nitlatehuis imo huaya.

³ Pero injuanti quinanquiliyque:

—¡Axtle! Amo xiya. Hueyi mopati. Tocuancaitacahua ax techchihuilise cuenta. Intla ticholose o techmictise miyac tlen tojuanti, ax tleno. Injuanti san mitztemohuaj ta para mitzmictise. Huan ta tlahuel miyac mopati. Mopati queja 10 mil tlen tojuanti. Más cuali ximocahua nica para titechtitlanilis tlapalehuili intla monequis.

⁴ Huan David quinilhui:

—Cualtitoc, nijchihuas tlen imojuanti inquitaj para cuali.

Huan David ijcatoya campa cuapuerta ipan itepa nopa altepetl huan nochi isoldados pejqe quisaj ica pamítl para tlatehuise. Sequin pamítl quihuicayayaj 100 soldados huan sequin se mil.

⁵ Huan David quinilhui nopa tlayacanani Joab, Abisai huan Itai:

—Intla intechicnelíaj, xijmocuitlahuica notelpoca Absalón.

Huan nochi nopa tlacame quicajque tlen David quinnahuatijtoya nopa tlayacanca soldados tlen Absalón.

⁶ Huan yajque nochi isoldados David huan monamijque ininhuaya nopa israelitame tlen isoldados Absalón ipan se cuatitlamítl ipan tlali Efraín. ⁷ Huan isoldados

David quintlanque nopa sequinoc israelita soldados ipan se hueyi tlatehujcayotl tlen nelía chicahuac. Huan quinmictijque 20 mil tlen injuanti. ⁸Huan nochi nopa soldados tlen motehuyayaj mosemantoyaj ipan nochi nopa hueyi cuatitlamitl tlen ajsi campa hueli ipan nopa tlali. Huan más miyac mijque pampa mococojque ipan nopa cuatitlamitl tlen fiero, huan ax queja tlen mijque ica tepostli.

⁹Huan Absalón yahuiyaya ipan se macho huan monamijqui ininhuaya isoldados David. Huan quinejqui mochololtis, pero nopa macho calajqui itzala se ahua cuahuitl tlen quiپیayaya miyac imacua-yohua. Huan nopona Absalón cuatacanqui itzonteco huan mocajqui cuapilijtoc huejcapa huan imacho yajqui iselti. ¹⁰Huan se tlen isoldado David quiitac huan quiilhuito Joab:

—Na niquitztoc Absalón cuapilijtoc ipan se ahua cuahuitl.

¹¹Huan Joab quinanquili:

—Intla tiqitac, ¿para tlen ax tijmicti? Na nimitztlaxtlahuijtosquía ica 10 tomi tlen plata, huan nimitzmacatosquía se motzinquechilpica para tielis se tlayacanquetl.

¹²Huan nopa tlatatl quinanquili Joab:

—Yonque tinechmacatosquía mil tomi tlen plata, ax nijmictisquía pampa nochi tojuanti tijcajque quema David mitzilhui ta, huan Abisai, huan Itai para ma tijmoucuittlahuise Absalón. ¹³Huan intla nijmictijtosquía, Tlanahuatijquetl David niman-tzi quimajtosquía para na nijchijqui huan ta moselti tinechteilhuijtosquía.

¹⁴Huajca Joab quiijto:

—Ayoc nimochiyas más nica.

Huan Joab quicuutejqui eyi cuatlamin-tli tlen huejhuehuyac huan yajqui campa cuatacantoya Absalón huan quicalaquili nochi eyi ipan iyolixco quema noja yoltoya ipan nopa ahua cuahuitl. ¹⁵Huan teipa ajsicoj majtlactli telpocame tlen quihuicayayaj iteposyolixtzajca Joab, huan injuanti quimictijque Absalón.

¹⁶Huan Joab tlanahuati ma quipitzaca nopa tlapitzali, huan quej nopa quinquetzqui isoldados para ma ayoc tlatehui-

ca para ax ma miquica sequinoc. ¹⁷Huan quitlalanque itlacayo Absalón huan quitlalijque ipan se hueyi ostotl tlen eltoya ipan nopa cuatitlamitl. Huan ipani quimontonojque miyac tetl. Huan nochi nopa israelita soldados tlen ihuaya motlalijtoyaj Absalón cholojtejque huan yajque ininchajchaj.

¹⁸Huan quema noja itztaya Absalón, tlanahuati ma quiquetzaca queja se tetyotl tlen hueyi tlen ya campa nopa Tlamayamitl tlen Tlanahuatiani. Huan tlen quisencajqui quipixqui se tlajcuiloli ica itoca. Huan nochi quitocajtlalijque “iteteyo Absalón” huan hasta ama queja nopa quitocajtíaj. Absalón quiijto quichijqui pampa ax quipixtoya se oquichpil para quihuicas itoca quema miquis.

¹⁹Huan Ahimaas, icone Sadoc, quiilhui Joab:

—Xinechahuili ma nimotlalos huan niquilhuiti David para TOTECO ya quimahanuijtoc tlen icualancaitacahua.

²⁰Huan Joab quinanquili:

—¡Axtle! Ax ta tlen tijhuicas tlajtoli ama, pero seyoc tonali, quena. Ama monequi seyoc quiyolmelahuati para mictoc icone nopa tlanahuatijquetl, pampa ax paquis ica nopa tlajtoli.

²¹Huan Joab quiilhui se tlatatl tlen ejqui tlali Etiopía:

—Xiquilhuiti David nochi tlen panotoc.

Huan nopa tlatatl tlen Etiopía mohuij-tzonqui iixpa Joab huan motlalojtejqui. ²²Huajca Ahimaas, icone Sadoc, sampa quiilhui:

—Xinechahuili ma nimotlali para nimotlalos iica ne tlatatl tlen yohui.

Huan Joab quinanquili:

—¿Para tlen tijnequi tiyas? Ax tleno tijlanis ica tlen tiqijtoti.

²³Huan Ahimaas tlananquili:

—Yonque ax tleno nijtlanis, na nijnequi niyas.

Huajca Joab quiilhui:

—Huajca xiya.

Huan Ahimaas motlalojtijayajqui ipan seyoc ojtlí campa tlamayamitl huan quitlanqui nopa Etiopía tlatatl. ²⁴Huan Da-

vid mosehуйtoya campa nopa cuapuerta ipan nopa tepamitl tlen más tlatlajco ipan ne altepetl. Huan nopa tlatatl tlen quimocuitlahuayaya nopa altepetl itztoya tepanixco huan quiitac se tlatatl tlen motlalojtihualayaya iselti. ²⁵ Huajca quiihui Tlanahuatijquetl David. Huan David quiihui: —Intla huala iselti, huelis quihualica se cuali tlajtoli.

Huan quema monechcahuayaya nopa motlalojquetl, ²⁶ nopa tlatatl tlen quimocuitlahuayaya altepetl sampa quiitac para seyoc motlalojtihualayaya huan nojquiya iselti, huajca quitzajtzili tlen quimocuitlahuayaya cuapuerta ipan tepamitl:

—Seyoc tlatatl motlalojtihuala iselti.

Huan Tlanahuatijquetl David quicajqui huan quiijo:

—Huelis quihualica se cuali tlajtoli.

²⁷ Huan nopa tlachixquetl quiijo:

—Tlen tlayacantoc motlalojhua sanijqui Ahimaas, icone Sadoc.

Huan David quinanquili:

—Ahimaas yajaya se cuali tlatatl huan temachtli quihualica tlen cuali.

²⁸ Huan Ahimaas ajsico campa itztoya Tlanahuatijquetl David huan mohuijtzonqui hasta tlalchi, huan quitlajpalo huan quiihui:

—Ma tijtlascamatica TOTECO yajaya tlen moDios pampa mitzmanahuijtoc ininmaco mocualancaitacahua tlen momatlalantoyaj para mitztehuse.

²⁹ Huan Tlanahuatijquetl David quiihui Ahimaas:

—¿Quejatza itztoc Absalón?

Huan ya quinanquili:

—Ax nijmati, pampa quema Joab nechtitlanqui niquinitac miyac motlalanayayaj, pero ax nijmatqui tlaque panotoc.

³⁰ Huajca Tlanahuatijquetl David quiihui:

—Ximochiya huan ximoquetza nopona.

³¹ Huan ipan nopa tlalochtli ajsico nopa tlatatl tlen tlali Etiopía huan quiihui Tlanahuatijquetl David:

—Nijhualica se cuali tlajtoli. Toteco mitzmanahuijtoc tlen nochi mocualancaitacahua.

³² Huan nopa tlanahuatijquetl quitlajtlani:

—¿Itztoc cuali notelpoca Absalón?

Huan nopa tlatatl quinanquili:

—Nelcuali elisquía intla nochi mocualancaitacahua tlen teipa motlalanase mocahuase mictoque queja ama panoc ica Absalón.

³³ Huan nopa tlanahuatijquetl tlahuel moyolcueso huan tlejoc ipan icuarto itzonixco nopa puerta huan tlahuel mochoquiliyaya. Huan quiijojtijyajqui: “Nocone Absalón, nocone Absalón. Nipaquisquía intla na nimictosquía queja mopatlaca.”

Joab Quiyoltlali David

19 Huan quiihuitoj Joab para Tlanahuatijquetl David tlahuel mocuesohuayaya huan quichoquiliyaya icone, Absalón. ² Huan nochi nopa tlacame quimatque para David tlahuel mocuesohuayaya, huajca injuanti nojquiya tlahuel mocuesojque. ³ Huan nochi nopa soldados calajque ipan nopa altepetl ixtacatzí huan ica pinahualistli queja mochololtijosquía ipan se tlatehuijcyotl. ⁴ Huan nopa tlanahuatijquetl moixtajqui huan chocayaya chicahuac huan quiijtohuayaya: “Absalón nocone, Absalón nocone, nocone.”

⁵ Huan Joab hualajqui quiihuitaco Tlanahuatijquetl David huan quiihui:

—Tlanahuatijquetl, ama tlahuel titechpinahualitjtoc nochi tlen timitztequipanohuaj. Tojuanti timitzmanahuilijtoque moyolis tlen mocualancaitacahua huan tiquinmanahuijtoque moconehua, huan nochi mosihuajhua huan moompaca sihuajhua. Huan ama ta titechchihuilía queja tijchijosquía se hueyi tlajtlacoli. ⁶ Tiquininelía tlen mitzcualancaitaj huan tojuanti tlen timitzicnelíaj, titechcualancaita. Titechnextilijtoc ama para ax tleno topati moixpa huan achi más tipactosquía intla nochi techmictijosquía huan san Absalón itztosquía. ⁷ Na nimitzilhuía monequi xiquisa huan xiquinyolchicahua mosoldados pampa intla ax tijchihuas, temachtli ax mocahuas niyon se tlen injuanti ni yohuali mohuaya. Huan intla nochi mitzcaj-

tehuase elis más fiero que nochi nopa cuesoli tlen mitzajstihualajtoc ipan nochi moyolis hasta quema ticonetzi tieliyaya huan hasta ama.

⁸Huajca David quisqui huan mosehui campa cuapuerta tlen nopa altepetl, huan nochi nopa soldados huan altepetl ehuan quicajque para Tlanahuatijquetl David mosehujtoya campa nopa cuapuerta. Huajca nimantzi hualajque nochi injuanti quitacoj huan David quinseli ica yejyec-tzi. Huan nopa israelitame tlen itztoyaj ihuaya Absalón cholojque hasta ininchaj-chaj.

David mocuepqui altepetl Jerusalén

⁹⁻¹⁰Huan campa hueli ipan tlali Israel ica huejcapa israelitame mocamahuiyayaj huan quijtohuayayaj: “David techmanahuijtoc tlen tocualancaitacahua nopa filisteos, pero quema tijtlalijque Absalón para totlanahuatijca, ya quitojtocac David. Pero ama mijqui Absalón ipan tlatehujcayotl. Huajca ¿para tlen tijchiyaj? ¿Para tlen ax tiquilhuíaj David para ma mocuepa para elis totlanahuatijca sampa?”

¹¹Huan quicajqui Tlanahuatijquetl David, huan huajca quititlanqui se ma quinilhuiti ni tlajtoli Sadoc huan Abiatar nopa totajtzitzi tlen itztoyaj tlayacanani ipan tlali Judá ica tlatzintla. Quinilhui: “Xiquincama-huica nopa huehue tlacame ipan tlali Judá huan xiquintlajtlanica para tlen ax nech-notztoque para ma nimocuepa para sampa niitztos tlanahuatijquetl huan niitztos ipan nocaltlanahuatil ipan tlali Judá. Pampa nochi israelitame tlen itztoque ica huejcapa quinequij ma sampa niitztos inintlanahuatijca huan san imojuanti aya tleno inquijto-huaj. ¹²Xiquinilhui nopa tlali Judá ehuan para injuanti noicnihua huan san se tonacayo huan toeso. Ax quinamiqui nech-notzase hasta teipa para ma nimocuepa ipan nochaj ipan inintlal. ¹³Nojquiya xiquilhuica Amasa tlen eliyaya tlayacanquetl tlen soldados Absalón para nijtlalis para quinyacanas nosoldados huan ax Joab, pampa Amasa nomachcone. Xiquilhuica ma Toteco Dios nechtlatzacuilti inla ax nijchihuas tlen niquilhujtoc.” Queja nopa quijto David.

¹⁴Huan quema Amasa tlen achtohuiya quinyacanqui isoldados Absalón quicajqui para quichihuas David itlayacanca tlen nochi isoldados, huajca pejqui quinyoltla-líaj nochi israelitame ipan tlali Judá para ma quinzotzaca David. Huan ica san se ininyolo quintitlanqui ma quilhuitij David huan nochi tlen ihuaya itztoyaj ma mocuepaca ipan Jerusalén. ¹⁵Huajca Tlanahuatijquetl David quistejqui ica itlacaj-hua para mocuepase Jerusalén, huan quema ajsitoj campa apanose atemitl Jordán, nesiyaya queja nochi tlali Judá ehuan san sejco hualajtoyaj tlali Gilgal para quina-miquise David huan queja nopa san sejco panose ipan atentli.

¹⁶Huan Simei, nopa tlatcatl tlen achtohui quisqui altepetl Bahurim huan quitelchijqui David ama moishuiliti huan quina-miquico. Huan hualajqui ininhuaya nochi nopa israelitame tlen tlali Judá. Huan Simei tlen eliyaya icone Gera huan se iixhui Benjamín, ¹⁷ihuaya quinhualicayaya se mil tlacame tlen nojquiya iixhuihua Benjamín. Huan nojquiya ihuaya Simei hualayaya Siba tlen achtohuiya elqui itlatequipanojca Tlanahuatijquetl Saúl huan quinpixqui 15 iconehua huan 20 itlatequipanojcahua. Huan nochi injuanti ajsitoj achtohui ipan atemitl Jordán, ¹⁸huan tequitique chicahuac para quinpanoltijque nochi tlen ichaj ehuan David ipan atemitl Jordán. Huan miyac hueltas apanoque atemitl Jordán para ma quitaca Tlanahuatijquetl David quejatza injuanti cuali quitequipanohuayayaj. Huan quema Tlanahuatijquetl David apanosnequiyaya nopa atentli, Simei mohujtzonqui tlalchi iixpa, ¹⁹huan quilhui:

—Amo xinechtlajtlacolli ipampa nopa fiero tlamantli tlen nijchijqui quema tiquisayaya Jerusalén. Xinechtlapojpolhui huan ayoc xiquilnamiqui nochi tlen nimitzchihuilí. ²⁰Nijmati para tlahuel hueyi notlajtlacol ica ta, huan yeca ama nimo-achtohui tlen nochi ichaj ehuan José para nimitzseliqui.

²¹Huan Abisai huan iicni tlen eliyayaj iconehua Sarvia quilhujijque Tlanahuatijquetl David:

—¿Ax tijnequi ma tijmictica Simeí pampa mitztelchijqui ta tlen TOTECO mitztlapejpenijtoc?

22 Huan David quinnanquili:

—¡Axtle! Ax quinamiqui para imojuanti tlen iniconehua Sarvia intechilhuisse ma nijchihua tlen fiero. ¿Para tlen monequi miquis se ipan totlal Israel? Na nitlanahuatijquetl ipan Israel huan niquijtohua axaca tijmictise.

23 Huan teipa David quitlachili Simeí huan quiihúi:

—Amo ximomajmati, ax timiquis.

24 Huan nojquiya Mefi Boset quinamiquico Tlanahuatijquetl David, ya tlen iixhúi mijcatzi Saúl. Huan Mefi Boset ax moicxipajpactoya, niyon ax maltijtoya, niyon ax motentzoxintoya, niyon ax quipatlatoya iyoyo hasta quema David quisqui, huan hasta ama quema ajsitihualayaya ica paquillistli ipan Jerusalén. 25 Huajca David quiihúi:

—Mefi Boset, ¿para tlen ax tiyajqui nohuaya?

26 Huan Mefi Boset quinanquili:

—Ay notlanahuatijca, Siba notlatequipanojca nechcajcajajqui. Na nijnahuati ma quisiyalti se burro huan ma nechhualiquili para ipan nitlejcos para niyas mohuaya, pero nechcajcajajqui huan nechcajtejqui noselti. Tijmati para nimetzcuachoti ipan nochi ome nometz. 27 Huan ama nechistlacahuijtoc moixpa pampa mitzilhuijtoc para ax nijnejqui niyas mohuaya, pero ax neli. Pero ta titlanahuatijquetl, tijmati nochi queja tielisquía se tielhuiuca ejca Toteco Dios. Huajca sijchihua tlen tiquita para quinamiqui ica tojuanti. 28 Pampa tojuanti tlen tiichaj ehuan Saúl san quinamiquiyaya techmictijtosquía. Pero techicnelijtoc huan hasta technotzqui para ma niitztos mochaj huan ma nitlacuas mohuaya mojmotla. Ax tleno quinamiqui nimitztlajtlanis más.

29 Huan David quinanquili:

—Ax monequi ticamatis más. Ma eli queja niquijtojtoc para Siba huan ta innotlajcoxelhulise nopa tlali.

30 Huan Mefi Boset quinanquili:

—Más cuali nochi ma mocuili ya. Na

nipaqui miyac san pampa timocueptoc ica cuali ipan mocaltlanahuatil.

31 Huan nojquiya nopa huehue tlatcatl Barzilai hualajqui tlen altepetl Rogelim ipan tlali Galaad huan quipanoc atemitl Jordán hasta seyoc nali ihuaya Tlanahuatijquetl David. 32 Huan Barzilai ya eliyaya huehuentzi. Quipiyayaya 80 xihuitl. Yaja quimacayaya David huan itlacajhua nochi tlen inintechmonequi quema mocahuayayaj ipan altepetl Mahanaim pampa nelía quipixqui tomi. 33 Huan Tlanahuatijquetl David quiihúi:

—Nijnequi xiya nohuaya ipan altepetl Jerusalén huan nimitzmocuitlahuis.

34 Huan Barzilai quinanquili:

—Na ayoc nihuejcahuas para niitztos. ¿Para tlen niyas Jerusalén san para nimitztequimacati? 35 Ama ya nijpiya 80 xihuitl. Ayoc hueli nijmati intla ajhuiyac tlen nijcua huan tlen niqui. Ayoc hueli niquincaqui cuali nopa tlacame huan sihuame tlen huicaj. Huajca ¿para tlen nimitzohuijmacati? 36 Na nihualajtoc san para nimitzmacahuacqui nica campa atemitl Jordán. Huajca ¿para tlen tinechtencahuilía ni hueyi tlamantli? 37 San xinechcahuili nimocuepas ipan noaltepe huan nimiquis nepa campa notatahua mijque, huan nimotlalpachos campa inijuanti motlalpachoque. Pero nica itztoc nocone Quimam. Ma yohui mohuaya huan xijchihua tlen tiquita para cuali.

38 Huan Tlanahuatijquetl David quiihúi:

—Cualtitoc, ma yohui nohuaya Quimam huan nijchihuilis tlen nimitzchihuilijtosquía. Huan nochi tlen tijnequi tinechtajtlanis para nimitzchihuilis, nijchihuas.

39 Huan quema David huan nochi itlacajhua tlamipanoque ipan atemitl Jordán, David quitzoponi Barzilai huan quitiochijqui. Huan Barzilai mocuepqui ichaj. 40 Huan David nejnentiyajqui hasta altepetl Gilgal. Huan ihuaya yajqui Quimam huan nochi nopa tlali Judá ehuan huan nechca tlajco nopa tlacame tlen tlali Israel. 41 Huan nochi nopa israelita tlacame tlen hualajque tlali Israel ica huejcapa cualanque huan yajque quitatoy Tlanahuatijquetl David huan quiihujuique:

—¿Para tlen san nopa israelita tlacame tlen tlali Judá ica tlatzintla quinpanoltijque nochi mochaj ehuani huan nochi imotlamantizti ipan atemitl Jordán?

42 Huan nochi nopa tlacame tlen tlali Judá tlananquilijque:

—Tojuanti tijhijque nochi pampa ni tlanahuatijquetl huala ipan san se tohueyi familia ica tojuanti. Yaja iixhui tohuejcapan tata Judá queja tojuanti. ¿Para tlen incualanij ica ya ni? Ax tijtlajtlanjitoque ma techtlaxtlahui, niyon ma techtlamaca.

43 Huan nopa israelitame tlen tlali Israel ica huejcapa tlananquilijque:

—Tojuanti achi más toaxca Tlanahuatijquetl David huan ax imojuanti, pampa tijpiyaj majtactli huejhueyi familias ipan totlal, huajca majtactli hueltas más toaxca. Huan tojuanti tijnotzque para ma mocuepa ipan ichaj achtohui huan ax imojuanti. ¿Para tlen intechcocolijtoque huan intechiyocajtoc?

Huan queja nopa monajnanquilijque, pero nopa israelitame tlen tlali Judá ehuan camatiyayaj más fiero que nopa tlali Israel ehuan.

Moajcomanqui Seba ica David

20 Huan nopa tonal itztoya nozona se tlatcatl tlen eliyaya fiero iyolis tlen itoca Seba tlen eliyaya icone Bicri ipan nopa hueyi familia Benjamín. Huan yajaya quipitzqui tlapitzali huan quinilhui israelitame tlen ejque tlali Israel:

“InIsrael ehuan, xiyaca imochajchaj.

Ni David tlen icone Isaí ax totlanahuatijca.

Ax tleno tijselise nica.

Ma tiyaca tochajchaj ipan totlal.”

2 Huan ne tonal nochi israelitame tlen tlali Israel ica huejcapa quicajteque David huan quitoquilijque Seba, icone Bicri. Pero nopa israelitame tlen ejque ipan tlali Judá ica tlatzintla mocajque ihuaya, huan nejnenque ihuaya tlen nopa atemitl Jordán hasta Jerusalén.

3 Huan David ajsito ipan icaltlanahuatli, huan tlanahuati ma quinpanoltica ipan seyoc cali nopa majtactli iompaca sihuajhua tlen quincajtoya para quimocuitlahui-

se icaltlanahuatli. Huan David quintlali tlatequipanohuani para quinmocuitlahuise huan mojmotla quinmacayaya inintlacualis, pero ayoc cochqui ininhuaya. Nopona mocajque tzactoque iyoca tlen nopa tlanahuatijquetl queja cahual sihuame hasta quema mijque.

Joab quimicti Amasa

4 Huan Tlanahuatijquetl David quinahuati Amasa tlen achtohui elqui tlayacquetl tlen isoldados Absalón huan quihui:

—Xiquinnotzati nochi nopa soldados tlen tlali Judá para ipan eyi tonali monequi ma mosentilica huan ma monextica nica moixpa. Huan ta nojquiya monequi timonextis.

5 Huajca Amasa yajqui para quinsentilis nochi nopa soldados tlen tlali Judá, pero ax huelqui mocuepas ipan nopa tonal quema mocajtoya para mocuepasquía. 6 Huan Tlanahuatijquetl David quihui Abisai:

—Xiquinsentili nochi nosoldados tlen nica mocahuaj huan xijtoquili Seba, pampa huelis nechchihuilis más fiero que Absalón. Huan intla calaquis ipan se altepetl tzactoc para motlatis, elis ohui para tijpantise.

7 Huajca Joab ica isoldados tlen achi más tlapejpenilme huan tlen quimocuitlahuiyayaj nopa tlanahuatijquetl quisque Jerusalén ica Abisai para qitemotij Seba. 8 Huan quema inijuanti monechcahuiyayaj campa eltoya se hueyi tetl ipan altepetl Gabaón, monamijque ihuaya Amasa tlen quinsentiliyaya isoldados David queja quihui. Huan Joab quihuicayaya iyoyo tlen nochipa quitequihuiyaya ipan tlatehujcayotl huan motzinquechilpitoya ica se cinturón tlen quipiyayaya campa quiaj-cocuiyaya imachete ipan icuetlax tlen ax ohujti para quiquixtía. Huan quema monechcahuiyaya Amasa huan mohuijtzonqui, huetzqui imachete huan quitilanki. 9 Huan Joab quihui Amasa:

—¿Tiitztoc cuali, noicni?

Huan quitzquili itentzo Amasa ica inejmatl para quitzoponisquía.

10 Huan Amasa ax momacac cuenta tlacue quichihuilisquía Joab. Huan Joab quicalaquili iijtico nopa machete huan quicuitlaxcolquixti. Huan nimantzi mijqui Amasa huan nozona mocajqui huetztoc itlacayo. Huan Joab huan iicni, Abisai, nimantzi quisque quitemotij Seba. 11 Teipa se isoldado Joab moquetzqui campa eltoya itlacayo Amasa huan quijto:

—Tlen itztoc ihuaya David ma quitoquíllica Joab para quitemotij Seba.

12 Huan Amasa espoltic huetztocya tlajco ojtli huan nochi tlen panoyayaj moquetzayayaj huan quitlachiliyayaj. Huan nopa soldado momacac cuenta para nochi moquetzayayaj nozona, huajca quijicuenu itlacayo huan quixtazajqui ica se yoyomítl. 13 Huan teipa nochi quitoquilijque Joab.

14 Huan Seba panoc ipan nochi nopa altepetini ipan tlali Israel. Yajqui altepetl Abel Bet Maaca hasta ipan nochi inintlal tlen quisque ipan ifamilia Barim. Huan miyac mosentilijque ihuaya huan quitoquilijque. 15 Huan ajsicoj Joab huan nochi isoldados David hasta altepetl Abel Bet Maaca, huan quiyahualojque nopa altepetl huan quimontonojque tetl para huelis panose iixco nopa achtohui tepamítl. Teipa pejqque quixolehuaj nopa seyoc tepamítl tlen más tlajco ipan altepetl. 16 Huan se sihuatl tlen tlanamiqui cuatzajtzi ipan nopa altepetl huan quijto:

—Xinechcaquica, xiquilhuica Joab para nijnequi nijcamahuis.

17 Huan quema Joab monechcahui, nopa sihuatl quitlajtlani:

—¿Ta tiJoab?

—Quena —quinanquili Joab.

Huan ya quihuil:

—Xinechtlacaquili tlen, nimotlatequipojca, nimitzilhuis.

—Cualtitoc —quijto Joab.

18 Huajca nopa sihuatl quijto:

—Huejcaquiyaya nochi momatque quijtohua: ‘Aqui quinequi quimatis se tlenijqui ma tlajtlani consejo ipan altepetl Abel’, huan queja nopa mosencahuayaya nochi cualantli, pampa toaltepe quinpiyayaya tlacame tlen tlanamiquij. 19 Na nitztoc ininhuaya tlen quinequij para oncas

tlatlepanitacayotl para totlanahuatijca huan para tiitztose ica cuali. Huan ama ta tijnequi tijxolehuas toaltepe tlen ya tlacahuel miyac xihuítl quiipiya. ¿Cuali para tijxolehuas tlen iaxca TOTECO?

20 Huan Joab quinanquili nopa sihuatl:

—Ax nijnequi nitlaxolehuas. 21 Pero se tlatcatl itoca Seba tlen icone Bicri huan tlen huala ipan nopa cuatitlamítl ipan tlali Efraín motlanantoc para quitzontlamítlis itlanahuatilis Tlanahuatijquetl David huan yajaya calactoc ipan ni altepetl. Xitechmactili huan tijcahuase ni altepetl.

Huan nopa sihuatl quinanquili Joab:

—Cualtitoc, timitzmajcahuilise itzon-teco tlen ni tepamítl.

22 Huan nopa sihuatl ica miyac tlanamiquistli yajqui huan quincamahui nochi nopa altepetl ehuani. Huan injuanti quitzontejque itzonteco Seba, icone Bicri, huan quimajcahuilijque Joab. Huan Joab quipitzqui nopa tlapitzali para ayoc ma tlatehuise isoldados. Huan quicajque nopa altepetl, huan nochi mocuepque ininchajchaj. Huan Joab yajqui ipan altepetl Jerusalén campa itztocya Tlanahuatijquetl David.

Itlatequipojcahua David

(2 S. 8:15-18; 1 Cr. 18:14-17)

23 Huan Joab quinnahuatiyaya nochi israelita soldados. Huan Benaía tlen elqui icone Joiada quinnahuatiyaya nopa soldados tlen más tlapajpenilme tlen quimocuitlahuiyayaj nopa tlanahuatijquetl huan motlaloahuayayaj ica tlajtoli. 24 Huan Adoram quinnahuatiyaya nopa tlacame tlen monequiyaya tequitise se quesqui tonali san tlapic para quitlaxtlahuise impuestos nopa tlanahuatijquetl. Huan Josafat, icone Ahilud, eliyaya tlen quijcuilo sesen tlanantli tlen panoc ipan itlanahuatilis David mojmotla. 25 Huan Seba elqui itlajcuilojca, huan Sadoc huan Abiatar eliyayaj totajtztzi. 26 Huan Ira, tlen ejqui pilaltepetzi Jair, nojquiya eliyaya totajtzi, pero mocajqui san ica David.

Eyi xihuítl tlen mayantli

21 Ipan nopa tonali quema David eliyaya tlanahuatijquetl oncac se hue-

yi mayantli, huan queja nopa elqui eyi xihuitl. Huan David momajito ica TOTECO huan quitlajtlani: “¿Ajqueya itlajtlacol para hualajtoc nopa mayantli?”

Huan TOTECO quihui: “Hualajtoc ipampa itlajtlacol Saúl huan ichaj ehuan tlen quinpacki temictíaj, huan yeca quinmictijque nopa gabaonita tlacame.”

²Huajca David quinnotzqui nopa gabaonitame tlen noja itztoyaj, huan camatic ininhuaya. (Nopa gabaonitame ax eliyayaj israelitame. Inijuanti eliyayaj tlen noja mocajque tlen nopa amorreos. Huejcajquiya israelitame ininca mocajque ica se amatlajcuiloli para ax quinmictisquíaj. Pero Saúl, quena, quinmicti sequin pampa quinculancaitayaya pampa ax israelitame. Ax ejque ipan tlali Israel, niyon ipan tlali Judá.) ³Huajca David quintlajtlani nopa gabaonitame:

—¿Tlaque huelis nimechchihuilis para quantzi nimechcuelis por nopa tlen fiero inmechchihui Saúl? ¿Tlaque nimechmacas para intechtlapojpolhuise tiisraelitame huan inquitlajtlanisquíaj TOTECO ma techtiochihua sampa?

⁴Huajca nopa gabaonitame quinanquilijque David:

—Ax tijnequij tomi, niyon oro, niyon plata, pampa Saúl ax techtlahuiquilía ya nopa. Niyon ax quinamiqui tipehuase tiquinmictise israelitame ipampa itlajtlacol.

Huajca David quinihui:

—Huajca ¿xinechilhua tlaque inquitaj cuali ma nijchihua huan ya nopa nijchihuas?

⁵Huan inijuanti quinanquilijque:

—Nopa mijcatzi Tlanahuatijquetl Saúl eliyaya nopa tlatcatl tlen quinequiyaya techtlamimictis para niyon se tlen tojuanti ax mocajtosquía tiyoltoque ipan nochi tlali Israel. ⁶Huajca xitechmaca chicome iixhuihua ya. Huan tiquincupilose tlamiyaca iixpa TOTECO ipan Gabaa tlen eliyaya ialtepe Saúl, yajaya tlen TOTECO achtohui quitlapepeni para elis tlanahuatijquetl.

Huajca David quinihui:

—Cualtitoc, nimechmacas.

⁷Pero Tlanahuatijquetl David ax quinmacac Mefi Boset, icone nopa mijcatzi Jonatán huan iixhui nopa mijcatzi Saúl, pampa ica mocajtoya Jonatán iixpa TOTECO para quinmocuitlahuis iconehua. ⁸Huajca David quinitzqui ome tlacame tlen eliyaya iixhuihua Saúl, se itoca Armoni huan seyoc tlen nojquiya itoca Mefi Boset. Pero inijuanti quipixque ininnana Rizpa tlen eliyaya iichpoca Aja, se iompaca sihua Saúl. Huan David nojquiya quinitzqui seyoc macuilti iixhuihua Saúl tlen eliyayaj itelpocahua iichpoca Saúl tlen itoca Mical, huan inintata elqui Adriel, tlen eliyaya icone Barzilai nopa meholatita tlatcatl. ⁹Huan David nochi quinmactili nopa gabaonitame, huan inijuanti quincupilojque ipan se tepetl iixpa TOTECO. Huan nochi chicome mijque ica sampa quema tlacame sanoc pejttoyaj quipixcase cebada.

¹⁰Huan Rizpa, iichpoca Aja, quicuito se yoyomtl tlen fiero huan quipatlajqui ipan se hueyi tetl nechca campa quincupilojtoyaj itelpocahua huan nozona mocajqui. Huan ax quincahuili totome ma monechcahuica tonaya campa inintlacayohua, niyon tlapiyalime ma monechcahuica ica tlayohua. Huan queja nopa quichijqui tlen quema pejqui pixcaj huan hasta quema pejqui tlahuetzi huan nochi quimachilijque para nopa tlali ayoc quihuicayaya tlajtlacoli iixpa TOTECO.

¹¹Huan quiyolmelajque David para Rizpa, tlen eltoya se iompaca sihua Saúl, quinmocuitlahuiyaya inintlacayo itelpocahua, ¹²⁻¹⁴huajca David tlanahuati ma quintlalpachoca ipan altepetl Zela ipan tlali Benjamín campa quitlalpachojque Cis, itata Saúl. Huan nojquiya David tlanahuati ma quicuitij iniomiyohua Saúl huan Jonatán. Nopa tlacame ipan altepetl Jabes Galaad quichitejque iniomiyohua Saúl huan Jonatán ipan tianquis ipan altepetl Bet Sán campa nopa filisteos quincupilojtoyaj quema quinmictijque ipan tlatehuijcaoyotl nepa Gilboa. Huan David tlanahuati para ma quihuicaca iniomiyohua Saúl huan Jonatán huan quitlalpachose ininhuaya iniixhuihua. Huan nochi mochijqui queja Tlanahuatijquetl David tlanahuatij-

toya. Huan sampa pejqui quinnanquilía TOTECO quema nopa israelitame quitlaj-tlaniyayaj se tlenijqui huan tlanqui nopa mayantli.

Tlatehujcayotl ica nopa filisteos

¹⁵Huan se tonal quema nopa filisteos sampa quisque para quintehuisse israelitame, yajqui David ininhuaya nochi isoldados. Huan quema quintehuiyayaj, David nelía tlaxicojqui. ¹⁶Huan ajsico se filisteo tlatcatl huejcapantic tlen itoca eliyaya Isbi Benob. Eliyaya se iniixhui nopa tlacame tlen tlahuel huejcapantique. Huan quihualicayaya icuatlami tlen huehueyac tlen quipiyyaya 30 kilos ietica huan imachete yancuic tlen oncac tlatentili. Huan monechcahui para quimictis David. ¹⁷Huan Abisai, itelpoca Sarvia, quipalehuico David huan quimicti nopa filisteo. Huan teipa nochi isoldados David quiilhuijque ma ayoc quisasquía ininhuaya ipan se tlatehujcayotl. Quiijtojqque intla ya miquis, elis queja sehuis nopa tlahuili ipan tlali Israel. Huajca David ayoc yajqui ipan tlatehujcayotl.

Quintehuijque huejcapantique tlacame

(1 Cr. 20:4-8)

¹⁸Huan teipa quema panoc tonali, sampa oncac seyoc tlatehujcayotl ica nopa filisteos ipan tlali Gob. Huan Sibecai, se husatita tlatcatl, quimicti Saf tlen nojquiya huejcapantic pampa elqui se iniixhui ini-juanti tlen tlahuel huejcapantique. ¹⁹Huan nojquiya seyoc huelta oncac seyoc tlatehujcayotl ipan Gob ica nopa filisteos huan Elhanán, icone Jaare Oregim, tlen altepetl Belén quimicti seyoc Goliat tlen altepetl Gat tlen nojquiya huejcapantic huan quihucayaya icuatlami tlen huehueyac tlen tomahuac.

²⁰Huan oncac seyoc tlatehujcayotl ipan altepetl Gat huan itztoya nozona se tlatcatl tlen nelía huejcapantic tlen quipiyyaya 12 imacpilhua huan 12 ixocpilhua, chicuase ipan sese ima, huan chicuase ipan sese iicxi. Huan ya nojquiya eliyaya icone se tlatcatl tlen tlahuel hueyeyi. ²¹Huan quinhuetzquili israelitame, huan

huajca se tlatcatl itoca Jonatán quimicti. Yaja eliyaya icone Simea, iicni David. ²²Huan nochi ni nahui huejhueyeyi tlacame itztoyaj iniixhuihua nopa huejcapantique tlacame ipan altepetl Gat. Huan nochi mijque ininmaco David huan isoldados.

Nopa huicatl tlen David quiijcuilo

(Salmo 18)

22 Huan ya ni eltoc nopa huicatl tlen David huicac para TOTECO pampa quinmanahuijtoya tlen nochi icualancatitacahua huan tlen Saúl. ²Quiijto:

“TOTECO, mopan ta nimotlatía.

Ta tlen tinechmanahuía queja nielisquía calijtic ipan se cali ica tepamitl tlen tilahuac.

Ta tinotemaquixtija.

³NoTeco Dios, ta tinechyahualohua para ax huelis nechajsise nocualancatitacahua.

San ipan ta nimotemachis.

Ta tlen tinechyahualohua para tinechmanahuis tlen mosisinijca tlacame.

NoTeco Dios, ipan ta nijmati nitemachtli.

Tinotemaquixtija.

Tinechmanahuía ica tlen nechmictisquía.

⁴Nijnnotzas, TOTECO, tlen quinamiqui tijhueyichihuase.

Huan yajaya nechmaquixtis tlen nocualancatitacahua.

⁵Quema nochi nechyahualohuayayaj para nechmictise,

huan nijmatqui nechtlanisnequiyaya tlen ax cuali ica nochi ichichualis, nimitztzajtzili.

⁶Quema nijmatiyaya nimiquisquía huan nechtilanayaya campa mijcatzitzili,

huan nimoixnamiquiyaya ica miquistli,

⁷huajca ipan notlahuijcayo nijnotzqui TOTECO.

Quena, nijtztzajtzili noTeco Dios ma nechpalehui.

Huan yajaya nechtlacaquili hasta ne- pa ipan elhuicac.

- Quena, quichihui cuenta tlen niquilhui, huan nechpalehui.
- ⁸Huajca chicahuac mojmolini tlali, huan nojquiya molini elhuicactli campa motlatzquilijtoc.
- Nochi mohuihuixojque pampa Toteco Dios cualanqui ica nocualanca-itacahua.
- ⁹Elqui queja poctli quisayaya ipan iyacatzol.
- Huan icamaco quisayaya tfilelemectli tlen tetzontlamiltiyaya.
- Quena, elqui queja lemeniyaya miyac tlicuahuitl, pampa tlahuel cuantoc.
- ¹⁰Huan TOTECO quiechcapano elhuicactli huan hualtemoc para nechpalehuis.
- Nejnentihualajqui ipan mixtli tlen nel-yayahuic.
- ¹¹Elqui queja TOTECO tlejcoc ipan ieltlapal se querubín elhuicac ejquetl huan patlantihualajqui ajacatipa.
- ¹²Yaja motzajqui ica tzintlayohuilotl, huan atl quiyahualo para ax aqui quitasquía.
- ¹³Tlahuiyaya itlatlanex TOTECO huan elqui queja tlapetlaniyaya iixpa.
- Huan itlatlanex lemeniyaya queja tlicuahuitl.
- ¹⁴Tlatomonqui nelía chicahuac tlen elhuicac huan ajsic campa hueli, pampa TOTECO Tlen Más Hueyi camatic.
- ¹⁵Quimajcajqui cuatlamintli huan nocualancaitacahua cholojque campa hueli.
- Tlahuel tlapetlanalti huan ax quimatque tlaque quichihuase.
- ¹⁶Quema yajaya tlailpitzqui ica cualantli, quixejxelo nopa tlahuel huejcatla hueyi atl, huan nopa miyac ojtli tlen eltoc atzintla monexti.
- Huan nesqui tlanemijya nochi itzinpehualtil ni tlatpactli, pampa TOTECO teajhuac chicahuac.
- ¹⁷TOTECO momaxitlajqui tlen elhuicac huan nechitzqui.
- Nechmaquixti quema nimisahuiyaya ipan miyac atl.
- ¹⁸Nechmanahui tlen nocualancaitacahua tlen más tetique.
- Nechmaquixti tlen inijuanti tlen techcualancaitayayaj, huan tlen nechonpanoyayaj ica ininchicahualis.
- ¹⁹Inijuanti motlalijque noca na quema nechajsitoya se hueyi cuesoli.
- Pero TOTECO nechpalehui huan nechtlali campa temachtli.
- ²⁰Nechhuicac campa ax mahuilili.
- Nechmaquixti pampa nechicnelía.
- ²¹TOTECO nechtlaxtlahujtoc pampa nijchihua tlen xitlahuac iixpa.
- Nechpalehui pampa quiiat para ax tleno nijchijtoya.
- ²²Quena, nijtoquilijtoc iojhui TOTECO, huan ax nijcajtoc.
- Ax nijcajtejtoc noTeco Dios para nijtoquilis tlen ax cuali.
- ²³Niquixmati itlanahuatilhua, huan ax quema nimohuejcatlalijtoc tlen quiijtohua.
- ²⁴Ninejntoc xitlahuac iixpa, huan nimomocuitlahujtoc para ax nitlajtlacolchihuas.
- ²⁵Yeca TOTECO nechtlaxtlahujtoc, pampa nijchijtoc tlen xitlahuac.
- Nechtiochijtoc pampa nechitztoc para nitlapajpactic iixpa.
- ²⁶Ta, TOTECO tiquintlasojtla tlen tetlasojtlaj.
- Tiquinchihuilía nel xitlahuac tlen nejnemi xitlahuac.
- ²⁷Timonextía titlapajpactic ica tlen tlapajpactic.
- Pero timonextía tlahuel tichicahuac ica inijuanti tlen fiero inintlalnamiquilis.
- ²⁸Ta tiquinmaquixtía tlen mocuesohuaj, pero tiquintlachilía tlacame tlen mohueymatij, tiquinicnotlalía.
- ²⁹TOTECO, tinotlahuil.
- Tinechtlahuilía ipan tzintlayohuilotl.
- ³⁰Ica mochicahualis Toteco Dios huelis niquintlanis miyac soldados tlen nocualancaitacahua.
- Huelis nihuitonis para nipanos iixco nopa tepamitl ipan inialtepe.
- ³¹Xitlahuac nochi iojhui Toteco Dios.

- Nochipa quisa melahuac tlen quijto-
hua itlajtol TOTECO.
- Yaja quinmanahuía nochi tlen mote-
machíaj ipan ya.
- ³²Axaca seyoc Dios,
san yajaya TOTECO.
Axaca seyoc quipiya tetili para tech-
manahuis queja Toteco Dios.
- ³³Yaja Toteco Dios tlen nechchicahualis-
maca.
Quichihua temachtli noojhui.
- ³⁴TOTECO quichihua noicxihua ma elica
ajacasotzitzi queja masame ini-
icxihua.
Quinchihua temachtli queja iniicxihua
chivojme tlen motlalohuaj cam-
pa tepeixco.
Techtlalijtoc huejcapa huan niya ica
temachili.
- ³⁵TOTECO nechmaca noyajatil para hue-
lis nitlatehuis.
Nechfuerzajmaca hasta ica noma hue-
lis nijcuelpachos se tetic tepos
huitoli tlen quichijtoque ica
bronce.
- ³⁶Ta tinechmanahuía queja se tepostli
tlen nechyahualohua.
Quena, tinechmaquixtía huan ica mo-
tlacnelil tinechhueyichijtoc.
- ³⁷Noojhui tijchijtoc patlahuac para ax
niohuijtis,
huan para ax nimoxitlanis quema ni-
nejnemis.
- ³⁸Niquintoquili nocualancaitacahua,
huan niquintzontlamilti.
Ax nimocuepqui hasta quema nochi
niquinmictijtoya.
- ³⁹Niquintzontlamilti nochi para axaca
huelis sampa motlalanas.
Inijuanti huetzque noicxitla.
- ⁴⁰Ta tinechfuerzajmacac para huelis ni-
tlatehuis.
Ta tinechtlanilijtoc nocualancaitaca-
hua huan mocajtoque noicxitla.
- ⁴¹Huan ta tijchijqui para nochi nocualan-
caitacahua ma choloca noixpa.
Niquintzontlamiltijtoc nochi tlen
nechcualancaitayaj.
- ⁴²Inijuanti tlatzajtlijque para acayja
quimaquixtisquía,
pero ax aqui quinpalehui.
Hasta nojquiya quitlajtlanijqe TO-
TECO ma quinpalehui,
pero ax quintlacaquili.
- ⁴³Huajca na niqinchiqqui queja tlattej-
pochtli.
Niquintlaijyohuiliti huan ininpani ni-
moquejquetzqui queja soquitl
ipan ojtli.
- ⁴⁴Tinechmanahuijtoc tlen nopa fiero
tlacame tlen mopantíaj ipan no-
altepe.
Tinechtalijtoc para ica temachili ni-
elis niinintlanahuatijca miyac
tltatini.
Ama nechtequipanohuaj tlacame tlen
ehuaj tltatini tlen achtohuiya ax
niquinixmatiyaya.
- ⁴⁵Huan tlen ehuan sequinoc tltatini
huihuipicaj noixpa.
Nechneltoquilíaj quema quicaquij tlen
nochicahualis.
- ⁴⁶Sequinoc tlali ehuan momajmatíaj,
huan quisaj tlen campa motlatijtoyaj,
huihuipicatihualahuij noixpa.
- ⁴⁷TOTECO itztoc.
Ma tijpaquilismacaca yajaya ipan tlen
nimotlatía.
Ma tijhueyichihuaca Toteco Dios,
pampa yajaya tlen nechmaquixtía.
- ⁴⁸Toteco Dios quinmacuepilía nochi no-
cualancaitacahua.
Quintlantoc nochi altepetini huan
quinchijtoc ma nechtlepanitaca.
- ⁴⁹Quena, TOTECO nechmanahuijtoc tlen
nocualancaitacahua.
Nechtlalijtoc más huejcapa que nopa
tlacame tlen nechajsisnequiya-
yaj.
Nechmaquixtijtoc tlen nopa tlacame
tlen mosisiníaj nohuaya.
- ⁵⁰Yeca nimitztlascamati, TOTECO.
Nimitzhueyitlalis iniixpa tlen ehuj
nochi tltatini.
Nimitzhuicatis ni huicatl para nimitz-
paquilismacas.
- ⁵¹TOTECO, ta tinechmanahuijtoc huan ti-
nechtalijtoc nimotlanahuatijca.
Tinechtlasojtlatoc na, niDavid, tlen ta
tinechtlapejpenijtoc.

Ta tiquintlasojtlas nochi noteipa ix-huihua para nochipa.”

Itlamiya tlajtol David

- 23** Ya ni itlamiya tlajtol David:
 “Na niDavid, niicone Isaí, nica-mati.
 Na tlen Toteco Dios nechhueyitalijtoc.
 Na tlen nechtlapejpeni huan nechchij-qui nitlanahuatijquetl,
 Toteco Dios, yajaya tlen iDios tohuej-capan tata Jacob.
 Na tlen Toteco nechmacac miyac hui-catl yejyetzitzi para tiisraelitame hueli ica tijaquilismacase.
²Itonal TOTECO quitequihuía nocamac para ma niqijitos itlajtol.
 Toteco quichijqui para itlajtol ma quisa nocamaco.
³Yaja Toteco toDios tiisraelitame nechcamahuijtoc.
 Yaja tlen ipan tiisraelitame timochiyaj nechilhui:
 ‘Hualas se tlen tlanahuatis xitlahuac campa tlacame.
 Yaja nechimacasis huan tlanahuatis queja monequi.
⁴Yaja elis queja nopa tlahuili tlen quisa cualca.
 Elis queja quema tlahuijtihuala tonati yejyetzitzi ica ijnaloc quema ax onca niyon quentzi mixtli.
 Yaja temacas paquilistli queja techmaca paquili para chamanis sacatl ipan tlali quema yancuic tlaahuetzot.’
⁵Huan Toteco Dios quintlapejpenijtoc nochaj ehuan tlen teipa tlacajtiyase para tlanahuatise iixpa.
 Huan nohuaya quichijtoc se tlajtolsencahuali para nochipa tlen qui-piya nochi tlen noca mocajtoc nechchihuilis teipa.
 Nopa tlajtolsencahuali tlen nohuaya quichijqui qui-piya nochi tlanahuatili tlen monequi huan elis temachtli para nochipa.
 Temachtli yajaya quitlamichijtiyas sesen tlamantli tlen nechilhuijtoc quichihuas ica noixhuihua huan nochi quisas cuali para na.

Yonque noja polihui para panos, nijmati para se tonal panos nochi tlen nijnequisquía ma onca pampa queja nopa noca mocajtoc.

- ⁶Pero nochi tlen ax quitlapanitaj Toteco itztose queja huitztli tlen tijcuatepehuaj huejca.
 Axaca quinequis quinitzquis ica ima.
⁷Huan intla acajya quitzontequisnequis nopa huitztli,
 monequi momapiquis huan quihucas itepos cuatopil para ax quimachajcos.
 Monequi quintlatis ipan tlitl huan senquistoc quitlamiltis.”

Inintoca isoldados David tlen más motemacayaj.

(1 Cr. 11:10-47)

⁸Ya ni inintoca nopa eyi tlacame tlen más tetique huan más motemacayaj tlen nochi isoldados David; Yaja tlen más hueyi tlen ne eyi itoca Joseb Basebet tlen iixhui Tacmon tlen quinyacanqui nopa eyi. Ica icuatlaminhua tlen huejhuehucay quinmicti 800 tlacame ipan se tlatehuijca yotl.

⁹Nopa ompa hueyi soldado itoca eliyaya Eleazar tlen elqui icone Dodo huan iixhui Ahohi. Eleazar monexti para nelía motemacayaya quema san ni eyi tlacame huan David mocajque para quintehuse nopa filisteos. Huan nochi sequinoc israelita soldados cholojque. ¹⁰Huan Eleazar pejqui quinmictía filisteos nopa tonal, huan quinmictijtiyajqui hasta tlahuel tlaxicojqui. Huan macuatiyaya hasta ax hueliyaya quimajcahuas icuayo imachete. Huan Toteco nelía quipalehui David huan nopa eyi soldados, huan yeca tlahuel tlatlanque nopa tonali. Huan teipa nopa sequinoc israelitame tlen cholojtoyaj mocuepque san para quinquixtilise nopa filisteo soldados tlen mictoyaj nochi tlen ipati tlen quihucayajaj.

¹¹Huan nopa expa hueyi soldado itoca eliyaya Sama, icone Age, tlen ejqui altepetl Harar. Se tonal mosentilijque se hueyi pamtli tlen filisteo soldados para quintehuse israelitame campa itoca Lehi. Huan nochi sequinoc israelita soldados nozona choloj-tejque. ¹²Huan Sama moquetzqui tlatlajco

se mili tlen tlatoctli tlen nopa etl tlen siltic huan iselti quintehuijqui huan quimanahui nopa mili huan quinmicti miyac filisteos nopa tonal. Tlahuel quintlanqui, pampa TOTECO quipalehui.

¹³Se tonal quema pixquistli, nopa filisteo soldados mosansejcotilijtoyaj ipan tlamayamitl Refaim huan campa hueli pixcayayaj. Nojquiya mocalaquijtoyaj miyac filisteo soldados ipan altepetl Belén, ¹⁴huan huajca David mocahuayaya ipan nopa mيجا ostotl nechca Adulam pampa más temachtli. Huan nozona hualajque quipaxalocoy eyi soldados tlen nopa 30 itlayacanca soldados David tlen más motemacayayaj. ¹⁵Huan David quijto: “¡Nelia cuali elisquía para niquisquía se quentzi nopa cuali atl tlen ne ameli tlen eltoc ipuertajteno Belén!”

¹⁶Huajca nopa eyi tlacame tlen nelmotemacayayaj quisque huan apanoque campa itztoyaj nopa filisteos huan quiquixtijque atl ipan ne ameli nechca altepetl Belén huan quihuiquilijque David. Huan ya mocueso ica tlen quijtojtoya huan ax quic. San quitojayqui tlalchi iixpa TOTECO queja se tla-cajcahualistli. ¹⁷Huan quijto: “TOTECO, ¿quejatza niquisquía ni atl? Elisquía queja niquisquía inieso ni tlacame tlen motemacaque para nechcuiltoy, pampa huelis mic-tosquía san ipampa tlen niqijto.”

Queja nopa motemacayayaj ne eyi tlacame tlen quipaxalotoy David.

¹⁸Huan Abisai, iicni Joab huan icone Sarvia, quinnahuatitoyaya nopa 30 tlacame tlen más motemacayayaj ipan tlatehuijca-yotl. Se tonal iselti moixnamijqui ica 300 icualancatacagua huan quinmicti ica icuatlaminhua tlen huejhuehuyac. Yeca ya nojquiya hueyi queja nopa achtohui eyi tlen niquintocajti para más motemacayayaj tlen isoldados David. ¹⁹Abisai eliyaya más hueyi que nopa 30 huan yeca mochijqui inintlayacanca. Huan nochi quixmatque Abisai para hueyi, pero ax eliyaya se tlen nopa eyi tlen más tlaixmatilme.

²⁰Huan Benaía, icone Joiada, tlen altepetl Cabseel eliyaya se tlatatl tlen tlahuel motemacayaya. Ipan tlatl Moab quinmicti ome iconehua Ariel tlen itztoyaj huejcapantique. Huan se tonal quema tlashuetziyaya

quipanti se tecuani tlen itoca león huan quimicti ipan se ostotl. ²¹Huan seyoc huela Benaía quihucayaya se cuahuitl huan pejqui quitehuía se tlatatl tlen huejcapantique tlen tlatl Egipto ejquetl huan quihucayaya icuatlami tlen huehuyac imaco. Huan Benaía quiquixtili icuatlami tlen huehuyac huan ica quimicti. ²²Tlamantli quej ni quichijthualayaya Benaía, huajca nojquiya nochi quixmatque para hueyi queja nopa eyi tlacame pampa tlahuel motemacaque. ²³Pero ax eliyaya se tlen inijuanti. Pero nopa 30 soldados tlen tlahuel motemacayayaj quitepanitacaque miyac Benaía. Huan David quitequitlali ma quinnahuatis isoldados tlen mocajque ihuaya ya para quimocuitlahuei.

Nopa soldados tlen más mosemacayayaj

²⁴Ipan nopa 30 soldados tlen más mosemacayayaj itztoyaj ya inin:

Asael, iicni Joab,

Elhanán, icone Dodo, tlen altepetl Belén,

²⁵Sama tlen altepetl Harod,

Elica tlen altepetl Harod

²⁶Heles tlen altepetl Palti,

Ira, icone Iques, tlen altepetl Tecoa,

²⁷Abiezer tlen altepetl Anatot,

Mebunai tlen altepetl Husah,

²⁸Salmón tlen altepetl Ahoh,

Maharai tlen altepetl Netofa,

²⁹Heleb, icone Baana, tlen altepetl Netofa,

Itai, icone Ribai, tlen altepetl Gabaa

ipan inintlal iixhuihua Benjamín,

³⁰Benaía tlen altepetl Piratón,

Hidai tlen ehuyaya campa itlaixtemolis Tepetl Gaas,

³¹Abi Albón tlen altepetl Arba,

Azmavet tlen altepetl Bahurim,

³²Eliaba tlen altepetl Saalbon,

Jonatán, se icone Jasén,

³³Sama tlen altepetl Arar,

Ahám, icone Sarar, tlen nojquiya

hualajqui tlen altepetl Arar;

³⁴Elifelet, icone Ahasbai, tlen altepetl

Maaca,

Eliam, icone Ahitofel, tlen altepetl Gilo,

³⁵Hezrai tlen altepetl Carmel,

Paarai tlen altepetl Arba,

- 36 Igal, icone Natán, tlen altepetl Soba, Bani, tlen altepetl Gad,
 37 Selec tlen altepetl Amón,
 Naharai tlen altepetl Beerot (tlen eliyaya itlamocuitlahuijca Joab, icone Sarvia),
 38 Ira tlen altepetl Itra,
 Gareb tlen altepetl Itra,
 39 huan Urías, nopa heteo tlatcatl.
 Huajca ica nochi eliyayaj 37 isoldados David tlen más mosemacayayaj para tlatehuise.

David quinpohua nopa israelitame

(1 Cr. 21:1-17)

24 Huan TOTECO sampa cualanqui inihuaya nopa israelitame, huan quichijqui David ma quinpohua nochi isoldados ipan itlanahuatilis ipan tlali Israel huan Judá. ²Huajca David quinahuati Joab, nopa tlayacanquetl tlen isoldados, quihuihui:

—Xiya ipan nochi huejhueyi familias tlen israelitame tlen tlali Dan ica huejcapa hasta altepetl Beerseba ica tlatzintla, huan xijtlalana se censo para nijmatis quesqui tlacame itztoque tlen tetique para tlatehuise.

³Huan Joab quinanquili David:

—TOTECO moDios ma mitzcahuili tiitztos miyac xihuitl más para tiquitas quejatzatza Toteco quinmiyaquilis mosoldados cimen hueltas más que tlen ama eltoc, pero ax quinamiqui para timohueyimatis quema tijmatis para tlahuel miyac mosoldados.

⁴Pero Tlanahuatijquetl David ax quichihui cuenta huan ax quinchihui cuenta nopa sequinoc tlayacanani tlen isoldados, huan quijito para ma mochihua nopa censo. Huajca Joab huan nochi nopa tlayacanani tlen soldados quisque iixpa nopa tlanahuatijquetl huan yajque quiniucuilotoj nochi nopa israelita tlacame. ⁵Huan achtohui apaque atemilt Jordán huan pejqe quiniucuilohuaj tlacame ipan altepetl Aroer, huan teipa ipan nopa altepetl tlen eltoc tlatlajco nopa tlamayamitl, huan teipa yajque altepetini Gad huan Jazer. ⁶Teipa yajque tlali Galaad huan Cades ipan inintlal nopa heteo tlacame, huan teipa ajsitoj ipan tlali Dan ica huejcapa. Huan sampa quichijque se huelta huan hualajque ipan pilaltepetzitzi nechca

altepetl Sidón. ⁷Huan teipa ajsicoj ipan altepetl Tiro huan ipan nochi nopa altepetini tlen nopa heveo huan cananeo tlacame, huan para tlamise ajsicoj ipan altepetl Beerseba ica tlatzintla ipan tlali Judá. ⁸Huan quema tlanqui chichnahui metztli huan 20 tonali para tlajcuilojtineneque ipan nochi altepetini tlen israelitame, injuanti tlanque inintequi huan mocuepque altepetl Jerusalén. ⁹Huan Joab quihuihui Tlanahuatijquetl David quesqui tlacame moijcuilojque. Huan ipan tlali Israel eliyayaj 800 mil tlacame tlen noja tetique para tlatehuise ica tepostli huan ipan tlali Judá 500 mil.

¹⁰Teipa quema tlantoyaj quitlalanaj nopa censo, David moyolcueso pampa quinpoytoya itlacajhua. Huajca momajito ica TOTECO huan quihuihui:

—TOTECO, nitlajtlacolchijtoc miyac moixpa pampa niquinpojtoc nopa tlacame. TOTECO, nimitztlajtlanía xinechtlapojpolhui, pampa nieliyaya tlahuel nihuihuitic para nijchihuas ni tlamantli tlen nijchijtoc.

¹¹Huan ipan seyoc tonal ica ijnaloc Toteco quinojnotzqui itiocamanalojca Gad, tlen Toteco quitequihuiyaya para quicamahuís David huan quihuihui: ¹²“Xiya huan xiquihuiti David para monequi ma quitlapejpeni tlaque yajaya quinequi tlen ni eyi tlamantli tlatzacuiltlistli tlen na nijtencahuilía para nijchihuas.” ¹³Huajca yajqui Gad campa ichaj David huan quihuihui:

—Monequi timoilhuis huan tijtlapejpenis tlaque tlatzacuiltlistli tijnequi, huan na nimocuepas huan niquihuis Toteco tlen tinechilhuis. ¿Tijnequi ma onca chicomex xihuitl tlen mayantli ipan nochi motlal? O ¿tijnequi mocualancaitaca ma mitztojtocaca para eyi metztli huan ticholojtinemis iixpa? O ¿tijnequi para ma hualla se hueyi cocolistli tlen tlahuel tlamahua para eyi tonali ipan nochi motlal?

¹⁴Huan David quinanquili:

—Tlahuel nimocuesohua. ¿Quejatzahuelis nijmatis tlen más cuali para tojuanti? Ma tihuetzica imaco TOTECO huan tijselise nopa hueyi cocolistli, pampa yajaya hueyi itlalnecil. Pero ax ma tihuetzica ininmaco toculancaitacahua.

¹⁵Huajca TOTECO quititlanqui se coco-

listli tlen tlahuel fiero ipan nochi israelitame tlen Dan ica huejcapa hasta altepetl Berseba ica tlatzintla. Pejqui ica ijnaloc se tonal huan queja nopa elqui eyi tonali, huan mijque 70 mil israelitame. ¹⁶Huan quema nopa ielhuicac ejca TOTECO tlen temictiyaya quixitlajqui ima para temictis ipan Jerusalén, TOTECO moyolcuepqui huan quiilhui: “San ya nopa, ayoc xitemicti.”

Huan nopa elhuicac ejquetl itztoya ipan nopa piso campa quihuitequiyaya itrigo nopa jebuseo tlatatl tlen itoca Arauna. ¹⁷Huan David quiitac nopa elhuicac ejquetl huan momajito ica TOTECO huan quiijto:

—Na tlen nitlajtlacolchijtoc, xinechtlatzacuiliti na. Ni notlacajhua tlen itztoque queja nopilborregojhua, ax tleno quichijtoque. Se favor, xinechtlatzacuiliti san na huan nochaj ehuan.

David quichijqui se tlaixpamitl

(1 Cr. 21:18-27)

¹⁸Huajca Gad hualajqui quiitaco David nopa tonal ica se tlatjoli tlen TOTECO huan quiilhui; Xiya itlal Arauna, se jebuseo tlatatl, campa nopa piso campa quihuitequi itrigo, huan xijchihua se tlaixpamitl para TOTECO.

¹⁹Huajca David yajqui queja TOTECO quiilhujitoyaya itiocamanalajca, Gad, para ma quichihua. ²⁰Huan quema Arauna quiitac para monechcahuiyayaj campa ya, Tlanahuatijquetl David huan nochi itlatequipanojcahua, yajqui quinnamiquico huan mohujtzonqui hasta tlalchi iixpa, ²¹huan quiilhui:

—Tinotlanahuatijca, ¿para tlen tihualajtoc para tinechpaxalos?

Huan David quinanquili:

—Nijnequi nimitzcohuilis motlal campa tijhuitequi trigo para nijchihuas nopona se itlaixpa TOTECO para ma tlamis nopa cocolistli tlen fiero.

²²Huan Arauna quinanquili:

—Notlanahuatijca, ximocuili para elis

moaxca nochi tlen monequi. Nica itztoque torojme para tiquinmictis para tlacajcualistli. Nojquiya nochi ni cuahuitl tlen nijtequihuía para nijhuitequi trigo. Nojquiya onca nopa cuahuitl tlen nopa torojme quihuicaj ipan ininquechpa quema tlapoxahuaj san sejco. Nochi xijtequihui para tlitl para tijtlatlis nopa tlacajcualistli. ²³Nochi san nimitzmaca. TOTECO moDios ma quipacti nopa tlacajcualistli tlen tijmacas.



Quihuitequiyayaj trigo ica huacaxme.

²⁴Pero Tlanahuatijquetl David quiilhui:

—¡Axtle! Ax nijselis queja se regalo. Na nimitzcohuilis queja quinamiqui ipati, pampa ax nijnequi nijmacas TOTECO noDios se tlacajcualistli tlen ax tleno ica niqixitlajtoc.

Huan David quicohuili nopa lugar campa quihuitequiyaya trigo ininhuaya nopa huacaxme huan nopa cuahuitl, huan quitlaxtlahuí 50 plata tomi. ²⁵Huan David quichijqui se tlaixpamitl nozona huan quimacac TOTECO tlacajcualistli tlatlatili huan tlacajcualistli para ica moyolalise ihuaya. Huan TOTECO quitlacaquili tlen David quitlajtlaniyaya, huan huajca tlanqui nochi nopa fiero cocolistli ipan Israel.